


ANG TUBIG NGA KANUNAY'NG-ANAA GIKAN SA BATO

 Mapasalamaton kita niining buntaga tungod sa Presensiya sa Ginoong Dios, nga magasugod sa sayo nga mga buluhaton pinaagi sa paghatag kanato og usa ka mensahe, nga—nga kita angay gayu'ng “maminaw, og magmatinahuron” sa Iyang atubangan, ingon nga aduna Siya'y isulti kanato. Sigurado ko nga buhaton gyud Niya ang Iyang gikasaad. Tungod kanunay man Niyang ginatuman ang Iyang Pulong. Ug busa mapasalamaton kita nga nagkatigum tà, nga buhi, ug ang maania niini nga bahin sa Eternidad niining buntaga, ug makahimo sa pagsimba sa Ginoo pag-usab, ug sa pagtipon sa atong mga kaugalingon ug makapatalinghug Kaniya. Mao kana'y mga hinungdan nga nagakahiusa kita, para niini mismo nga katuyoan.

² Bueno, medyo misal-ot ako kang Igsoong Neville, nga wala damha, karong adlaw, tungod sa usa ka damgo nako. Nga . . . nagatoo ako sa . . . ako . . . sa mga damgo. Nagatoo ko nga nagapakighilambigit ang Dios sa mga tawo pinaagi sa mga damgo. Ug nagdamgo ako og talagsaon kaayo, niadtong miaging gabii. Nga, nagpaingon kono ko sa usa ka kilid, sa bungtod, paingon sa usa ka kan-anan kon diin ako—ako maniudto. Ug namatikdan nako nga, samtang haduol na ako sa maong lugar, nagatugtog kono sila, nagatugtog ang usa ka orkestra, gamit ang mga bayolin, ug ginalingaw ang mga tawo samtang nagapangaon ang mga niini. Ug may sa kung unsang butang bahin niadto nga dili nako gusto, busa gilabyan ko lang kadto. Ug may tawo akong nahinagbo nga pasaka ngadto sa bungtod. Ug mitan-aw ako, ug daghang mga tawo ang nagasaka sàb sa bungtod paingon niining maong kan-anan. Pero medyo mipalayo ako sa ilaha, miliko ko sa tuo, o sa wala.

³ Ug tungod niini, didto sa walog, makita ko ang tabernakulo. Nadungog ko ang tingog sa usa ka tawo, nga miingon, “Tagboa si Igsoong Branham didto sa usa ka ingon ani-ug-ingon ana nga likoanan. Panaug na siya didto sa bungtod. Ug isulti kaniya ang ingon ani-ug-anang butang.” Ug midali ko sa pag-adto niini nga likoanan.

⁴ Ug sa miabot na ang maong tawo, si Igsoong Neville man diay kadto nga nagasul-ob og kolor-tabonon nga amerikana,

mao mismo ang iyang hitsura sama sa iyang paglingkod dinha niining buntaga. Ug miingon kono siya, “Igsoong Branham, kung paingon ka sa lungsod,” miingon, “maayo unta—unta kung makaadto pud ka, tungod kay si Igsoong Hank. . .” Bueno, ang bugtong nailhan ko nga, Igsoong Hank, mao si Igsoong Henry Carlson, Hank man ang tawag namo sa iyaha. Ingon pa, “Basin maghunahuna siya og lahi nga dili na kaayo ka nagabisita sa tabernakulo kung maanaa ka man gani sa lungsod, o kaha sa palibot lang sa siyudad sa pipila ka adlaw.” Unya nakamata ako.

⁵ Ug, niadtong tungora, medyo mibati ko og lahi. Dili man gud nako gustong mosal-ot niadtong semanaha, hangtud nga akong gipangutana si Igsoong Neville kung aduna ba siya’y espesyal nga giandam para niining buntaga, para sa iglesia. Ug sama sa una pa, buotan gyud siya, og miingon, “Ari ka.” Busa, mianhi gyud kami. Gitawgan ko siya kagahapon nga dapit na sa kahaponon, ug mianhi ko karong buntaga, nga wala damha sa bisan kinsa man sa ato.

⁶ Karon nagatoo ko nga maayo gyud, una, nga—nga medyo akong isaysay sa inyoha ang pipila ka mga butang. Ako man gud, sa tan-aw sa daghang mga tawo, usa ako ka salikwaut kaayo nga tawo. Ug medyo salikwaut pud ko sa kaugalingon ko, mismo. Tungod, ginasunod ko lang gyud ang pagpanguna sa Balaang Espiritu, kutob sa akong mahimo. Ug mao kana ang nagapahimo kanato nga salikwaut, kita n’yo. Nagabuhat kita og mga butang usahay nga kita—nga paglingkod nato ug mapamalandongan nato usahay, “Nganong nabuhat ko man ang ingon niadtong butang? Giunsa ko man sa pagbuhat ang ingon niadtong butang?” Ug mahunahuna mo dinha mismo nga nabuhat mo eksakto ang dili mo unta angay’ng gibuhat. Apan kung magmapailubon ka lang, ug magtoo, ug sigurado ka nga gipangunahan ka sa Dios para buhaton kadto, nan maamgo mo nga ginapahinabo kadto nga husto man diay. Kita n’yo? Ug makadaghan nang higayon nga maamgo nato ang ingon-ana. Ug kabalo ko nga naamgo pud ni Igsoong Neville ang ingon-ana, sa makadaghan nang higayon. Ug nakaamgo sàb niana ang mga lider ug espirituhanon nga mga tawo.

⁷ Ngani dugay na nga panahon sa akong kinabuhi nga. . . Sa tinuod lang, sukad niadtong batan-on pa lang ako, wala ko gayud nabati ang mismong pagpanguna nga kinahanglan kong mopuyo dinhi sa—sa Jeffersonville. Sa una pa medyo mabug-at, para sa ako ang maningkamot nga mopuyo dinhi. Una sa tanan, dili gyud nagaangay kanako ang klima dinhi. Usa pa ka butang, daw sa aduna pu’y makapaguol og espiritu dinhi.

⁸ Kung inyong balikan ug tan-awon ang palibot dinhi, kung wala man kini naguba niadtong panahon nga nagbaha, adunay sulat mahitungod niadto, nga aduna ako, kaniadtong unang pagtawag kanako para sa ministerio, og andam na kong magsangyaw. Ug si Igsoong George DeArk ug ako. . .

⁹ Ug ang inahan ni Igsoong Graham Snelling, og si Igsoong Hawkins nga nagadumala og gasolinahan didto sa New Albany, ug daghang uban pa, ang mitagbo sa ako sa gawas sa usa ka gamay'ng lugar dinhi para sa panagtigum sa pag-ampo. Ug miingon pa gyud, nga kung magpabilin lang kono ko, daginoton nila ang bahin nga para unta sa pagkaon sa ilang mga anak, aron—aron lang makapatukod og tabernakulo, aron nga dili na sila mobalhin gikan sa usa ka lugar ngadto sa usa na usab ka lugar.

¹⁰ Sa dihang nadungog ko kadtong luoy'ng inahan, nga may gihawiran nga usa ka bata ug ug may usa pa ka bata nga iyang gikugos, nga miingon nga andam kono siya nga daginoton ang bahin nga para unta sa pagkaon sa iyang mga anak diha sa lamesa, aron lang makapatukod og usa ka lugar kon diin sila mahimong magpabilin ug magsimba, sobra na kaayo kadto para sa ako. Busa nagkita mi ni Igsoong George ug nagdesisyon mi nga magpabilin kami ug tukoron ang tabernakulo.

¹¹ Ug sa dihang natukod na ang tabernakulo, mora ba sa kanunay. . . Niadtong buntag nga gididikar ko ang tabernakulo, usa ka panan-awon ang miabot, nga nakasulat gani dinha sa ulohang-bato, kaniadtong miingon kanako ang Balaang Espiritu, “Dili kini ang imong tabernakulo.” Kita n'yo? Ug mao nga nangutana ko kung asa ang akong tabernakulo, ug gidala Niya ako didto ilalum sa mahayag nga asul nga kalangitan. Ug dayon miingon Siya, “Buhata ang buluhaton sa usa ka ebanghelista,” ug uban pa, sumala sa inyong nahibaloan. Nakasulat pud gani kadto sa mga libro.

¹² Natukod kadtong tanan. Ug usa ka adlaw kaniadtong nanghagbas ko og sagbot sa nataran didto kon diin nagapuyo karon si Igsoong Wood, ug ang akong ugangang-babaye pa ang nagpuyo didto niadtong panahona; milingkod ko niadto sa hagdanan sa luyo, nga usa ka gamay'ng karaang sementado nga hagdanan, nga gitukod ko kining gamay'ng lugar para sa akong ugangang-babaye kaniadto. Ug siya man ang mora'g tiglimpyo sa simbahan niadtong panahona, og nagaatiman niadto. Ug sa ingon ka klaro sama kang kinsa man nga makasulti, usa ka Tingog ang misulti sa ako, miingon, “Dili Ko ikaw mahimong panalanginan samtang nagapabilin ka dinhi. Kinahanglan mong ihimulag ang imong kaugalingon gikan sa imong mga paryente ug sa niini nga dapit.” Bueno, ako, mora gyud ko og wataswatason tungod niadto, sulod sa halos usa ka semana o sobra pa.

¹³ Sa kanunay, sa tanang panahon, Aduna gyu'y nagapasidaan kanako, “Lumakaw ka, lumakaw ka. Bumalhin ka didto dapit sa kasadpan. Magpadayon ka lang paingon sa kasadpan.” Bueno, ako. . . Kini pirming nagpabalaka kanako. Ug daw sa matag higayon nga . . .

14 Karon, bug-os na gyud kong nakadesisyon nga niining semanaha mobiyahe ako paingon sa Tucson, kon diin mag-abang ako og usa ka balay, para didto na mopuyo sa niining umaabot nga tingtugnaw; og para didto na paeskwelahon ang mga bata, sugod sa Septyembre. Aduna na ko’y balay. Gani aduna ma’y usa ka balay nga ihatag unta sa ako didto. Pero duna gyu’y sa kung unsang butang nga . . . Ug—ug kung wala ako . . .

15 May usa pa ka butang nga gusto kong isulti. Adisir namo gitukod kining balay dinhi, ang parsonage, kon diin kini napahimutang karon, dili gyud unta nako gustong tukoron kini kaniadto. Tigulang na man ang inahan sa akong asawa. Ug mihilak pa gani siya bahin niini kaniadto, ingon siya, “Dili gayud nako mabiyaan si mama dinhi, ingon nga nahibalo ko nga tigulang na siya, ug mahimong wala na’y mag-atiman sa iyaha.” Bueno, nasabtan ko kadto. Nasabtan ko man. Inahan gud niya kadto, ug ang bugtong inahan nga aduna siya, o magkaaduna man. Mao nga, nasabtan ko kadto. Busa, ako—nag-ampo ako sa Ginoo, ingon ko, “Ginoo, ingon nga dili ko ganahan sa lugar;” ingon ko, “pero himoa gihapon akong malipayon. Moadto ako sa kon asa Mo man gusto nga moadto ako, bisan asa pa. Pero dili pud nako gusto nga pasub-on ang akong asawa, nga ipahilayo ko siya gikan dinhi, ngadto sa usa ka lahi nga dapit diin wala siya’y kaila ni si bisan kinsa. Ug unya wala pa gyud ko sa tanang panahon, usab. Mao nga himoa lang kong malipayon nga makauban siya dinhi.”

16 Ug bueno, sa dihang gikuha na ang iyang inahan, ug atua na kini sa Kahimayaan, pagkahuman niadto ania na usab kini nga pag-awhag, kita n’yo, nga mobalhin na gyud karon. Mao nga wala ko kahibalo kung unsay buhaton.

17 Ug niadtong miaging adlaw tungod niadtong doktrina nga gipasiugdahan sa kaigsoonan, mibarug ako dinhi sa pulpito niadtong ulahing higayon nga ania ako dinhi ug gisultihan kamo nga dili ako moadto sa natad sa pagpangmisyon samtang nga anaa pa ang mga ingon-niana. Mao nga, matinahuron nga gitulid gyud kadto sa mga kaigsoonan. Naiklaro na kadto. Sulod ra sa baynte-kuwatro oras, nasulbad dayon kadto.

18 Karon bukas na usab sa ako ang natad sa pagpangmisyon. Pero wala pa ko kahibalo kung unsay buhaton. Wala ko kahibalo kung asa ako mopaingon. Nangamuyo ako sa Ginoo para sa usa ka panan-awon. Nangamuyo ako Kaniya nga sultihan ako sa kung unsay buhaton. Pero Iya lang úsa kong gipapabilin.

19 Bueno, kagabii sa dihang nanggawas na ang mga bata, ang akong asawa ug tanan na, gikan sa balay, nagsaad ako sa Ginoong Dios. Ug miingon ko sa Ginoong Dios, “Kung Imo akong panalanginan sa dalanon nga akong pagalaktan, alagaran ko Ikaw. Apan kinahanglan Mong ipakita kanako kung asa ako moadto, ug kung unsaon ko pag-adto, ug kung unsay buhaton

ko.” Busa, gitugyan ko ang akong kaugalingon sa Ginoo. Lakip na—lakip na ang ministerio ug tanan na, gitugyan ko kini sa Ginoo. Ug ingon ko, “Kon asa Ka man magaabli, kung unsa man ang Imong buhaton, nan molakaw ako sa niana nga dalanon. Hangtud nga maghimo Ka og paagi, magpadayon lang gihapon ako sa kung unsa ako hangtud nga maghimo Ka og paagi.” Ug gihangyo ko Siya nga himoon kining ingon ka klaro aron nga dili ako malimbongan, tungod kay nagatoo ko nga ania na kita sa kinasang-an nga dalan kon diin may butang gayud nga mahitabo.

²⁰ Ngani nadungog ko nga nagpropesiya bahin niini karong buntaga si Igsoong Neville, o nagpahayag niini kon diin nasayod ako nga—nga usa kini ka propesiya nga iyang ginapahinungdan. Karon, mao nga, nag-ampo ako para ninyong tanan, ug kinahanglan ko usab nga iampo ko ninyong tanan, aron nga pangunahan ako sa Balaang Espiritu sa eksakto gayud kung asa ako angay'ng moadto, og kung unsa ang angay kong buhaton, aron dili ako masayup.

²¹ Nakita n'yo, sa makadaghang higayon, gahunahuna ang mga tawo nga ang usa ka ma-propesiya nga gasa, basta na lang kono moingon ang Dios “Kuhaon Ko ikaw *dinhi*, ug ipahimutang ka *dinhi* dapit. Karon umanhi ka lang *dinhi*.” Pero dili man gyud Niya ginasulti sa imo ang tanan nianang mga butanga. Kay kung ginasulti Niya, nan unsa pa ma'y daugon sa pagtoo nga anaa kanimo? Kita n'yo? Kita n'yo, kamo, ginapabarug Niya kamo nga nag-inusara kaysa ni kinsa pa man. Kita n'yo? Mahimo n'yong tanan nga moduol sa ako ug mohangyo og pipila ka mga butang, pero wala pa Siya sukad napakyas kundi nagahatag gyud Siya kaninyo og katubagan. Husto kana. Oo. Hinoon mahimong mohangyo sàb ako sa Iyaha og mga butang para sa akong kaugalingon, ug makadaghan nang higayon nga ginapasagdan lang sà Niya ako, kita n'yo, ginapasagdan ko nga magpadayon lang ug maglakaw.

²² Ngani karon adunay mga butang nga kinahanglan ko mismong sulbaron, ug mga desisyon nga kinahanglan kong himoon. Ug mahinungdanon kaayo kini, nga dili pa nako eksaktong madesisyonan hangtud nga nakasigurado gyud ko nga Siya mismo kini ang nagasulti kanako. Ug ako—ako... wala Siya mihatag sa ako og panan-awon. Gipasagdan lang sà Niya ako. Mao nga ania ako nga mora'g usa ka ilo, mora'g ingon-ana, karong buntaga, ako—wala ako kahibalo kung asa ko mopaingon. Busa, ginatugyan ko gayud kini sa Ginoo.

²³ Ako—nabati ko niadtong tungora, tungod niadto nga damgo nga, daw sa kinahanglan kong mobalik dinhi sa tabernakulo ug tabangan si Igsoong Neville gawas kung adunay laing butang ang mahitabo sa akong pagbiyahe. Busa, ania ako.

24 Akong gipangutana si Igsoong Neville kaganina, “Kumusta na man ang paglambo sa iglesia?”

Ug ingon siya, “Maayo man.”

25 Ug nakabalita ko nga aduna sa gihapon kamo og espirituhanon nga mga gasa ug mga ingon-anang butang sa inyong taliwala, nga nagapamuhat, mga gasa sa pagpropesiya, ug—ug pagsulti’g laing mga pinulongan, ug paghubad og mga pinulongan, nga bag-ohay lang natong nadungog kaganina. Ug ang maong mga butang mga pagpalig-on man sa iglesia, ug mahinungdanon gayud.

26 Pero nahunahuna ko, tingali unyang gabii siguro akong, kung si Igsoong Neville. . . Kung dili man tà pangunahan sa Balaang Espiritu para sa lahi nga butang, unyang gabii gusto ko nga magpahigayon og. . . Kamong tanan, sa dili pa kamo manglakaw karong buntaga, pagsulat mo og pangutana ug ibutang kana dinhi, kon duna ma’y pangutana sa inyong hunahuna, aron nga mahibaloan pud namo kung unsa ba ang ginahunahuna sa iglesia. Mao kana’y paagi para mahibaloan sa mga pastor kung unsa ang anaa sa kasingkasing sa mga tawo. Ug ang matag usa sa inyo nga may pangutana, isulat n’yo kana ug ibutang ra kana dinhi. Kung wala man mo’y usa ka papel nga—nga masulatan niana karong buntaga, nan unyang gabii na lang ninyo isulat, sa sayo. Busa, buot kong mogahin og dakung oras kutob sa akong mahimo, bahin niana nga mga pangutana, aron masusi kana ug matubag kamo sumala sa Kasulatan.

27 Dayon kung itugot sa Ginoo, kung itugot sa Dios, nakahimo man ko og pahayag dinhi dili pa lang dugay, nga buot kong mamulong sa inyo mahitungod sa ulahing pito ka mga Selyo sa. . . sa Pinadayag. Bueno kung kita. . . dili nako mahuman sa paghisgot ang tanang Mga Selyo niining tuiga, tungod kay magsugod man kana sa ika-6 nga kapitulo sa Pinadayag, hangtud sa—hangtud sa ika-19 nga kapitulo, para mahuman ang Mga Selyo. Pero ang unang tulo o upat niana mahimo mang tubagon sulod sa usa ra ka gabii, sa hunahuna ko, usa ka Selyo matag gabii.

28 Karon, kung nasabtan nato, kita n’yo, mihunong kita dinha mismo sa Basahon sa Pinadayag, kon diin gilalin na ang Iglesia paingon sa Himaya, dayon ang tanang uban pang bahin niini mahitungod na sa pagpakighilambigit sa mga Judio, og dili na sa Iglesia. Kana’y pagpakighilambigit na sa nasud sa mga Judio. Busa kon atong balikan, gikan sa Pagsakgaw sa Iglesia, ug iaplikar. . . Makita nato dinhi kung unsay nangahitabo sa panahon sa Mga Selyo, ug sa panahon sa Iglesiang Gentil. Gisakgaw na nianang panahona ang Iglesia; ug didto sa nasud sa Israel, mobalik na kini ug dalhon ang Israel gikan sa panahon niadtong gibiyaan sila, hangtud na sa niining moderno nga

panahon; ug sa pag-abot sa Mesias, sa diha nga ila nang dawaton ang Mesias.

²⁹ Karon nasabtan ba ninyo kini? Gilalin na ang Iglesia. Ingon nga ang Dios nagpakighilambigit man una sa Iglesia, sa mga Kapanahonan sa Iglesia. Nasabtan nato kana. Dayon gilalin ang Iglesia paingon sa Himaya. Pagkahuman mobalik na ang Balaang Espiritu ug kabigon ang Israel, ingon nga usa ka nasud. Ug dalhon kini hangtud niana nga punto, samtang nagakahitabo ang pang-Kasal nga Panihapon, ug pagkahuman ipahibalik Sila pag-usab sa katapusan na sa panahon. Ipabutang ra nako ang akong pisara dinhi, ug para ma-drawing ko kini ug maitudlo kini, pag moabot na ang higayon. Dayon mobalik ang Ginoo kauban na ang Pangasaw-onon, ug makita Siya sa Israel. Ug, oh, pagkaanindot gayud niana nga panahon!

³⁰ Bueno, adisir nato maitakdo kini nga husto, adunay dakung mahinungdanon nga leksyon nga mamahimong kapandolan sa mga teologo ug sa daghang, mga magtutudlo sa tanang mga nangaging kapanahonan, ug bisan sa mga tawo sa Iglesia ni Cristo ug sa mga nagatambong aron manalinghug niini, kana mao, ang Setenta ka Semana ni Daniel. Kinahanglan natong. . . Dili kita makapadayon sa Pinadayag gawas kon maitakdo nato ang mahitungod sa Pangasaw-onon ug Israel diha sa Setenta ka Semana ni Daniel. Ug tingali, kung itugot sa Dios, kung manulti Siya kanako sa umalabot, nga maghisgot mahitungod sa pipila niining Setenta ka Semana. . . o, dili diay sa Setenta ka Semana, kondili sa ulahing pito ka Selyo. Dayon pagkasunod Dominggo, paningkamotan kong hisgotan ang Setenta ka Semana ni Daniel, sa sunod Dominggo, kon itugot sa Ginoo. Ug dayon mao kana ang mamahimong basihanan, kung Iya man kitang pangunahan, para magsugod mahitungod sa uban pang butang. Bueno, mahibaloan ra nato pag-abot na nianang higayona.

³¹ Magtinabangay kami ni Igsoong Neville para niini, ug buhaton ang tanan nga mahimo namo alang sa kaayohan sa mga tawo.

³² Bueno, sa matag pagbalik namo, nagaampo man kami para sa mga may sakit, og malipayon kami sa kanunay nga buhaton kana. Ug buhaton ko gayud kana sa matag panagtigum, kung duna ma'y sakit ang mga tawo, mag-ampo ako para kanila.

³³ Wala nako ginatinguha nga magkaaduna og unsa man nga pagpang-ila. Kita n'yo, bueno ania ang nahitabo. Naningkamot gyud ko. Ug nasayod ko nga nakabuhat ako og mga butang nga sayup; apan naningkamot ako nga magkinabuhi nga haduol gayud sa Dios, sa tanang panahon, sa Dios, og sa ingon-anang paagi man nagakahitabo ang mga panan-awon, sa ingon-anang paagi nagakahitabo ang mga niini. Gani may mga tawo nga mawad-an og mga butang, ug tawgan nila ako, mohangyo sa ako nga mag-ampo ko sa Ginoo, aron ipangamuyo kung asa

nahimutang ang maong nawala. Sama ra kaniadtong nawad-an si Jesse og mga mula, ug miadto ang mga anak niyang lalaki aron pangitaon ang propeta, ug gisultihan sila sa propeta nga nakauli na ang mga mula. Mora'g ingon niana, hinoon maayo man kana. Apan daghan na man gud kaayo, daghan kaayong mga tawo. . . . Dili lamang sa lugar nga sama dinhi; kondili sa tibuk kalibutan, kita n'yo. Busa tungod niini sigeng, pirmi akong nagakabalaka, ug ginapanerbiyos pud ka niini sa kanunay, hangtud nga moabot sa punto. . . .

³⁴ Ug mao gani kana'y hinungdan nga ang maong mga kaigsoonan nagpasiugda hinoon niadto nga doktrina, nga ako kono ang nagpakatawo nga Ginoong Jesus Cristo. Ug nasayod ta nga moguba gayud kana sa Ministerio, ug magadala lang og kaulawan kang Cristo ug tanan na. Kita n'yo? Busa mao kana'y hinungdan nga kinahanglan ko silang uyogon og ayo, aron mahunong na dayon kadto, og ipahibalo kanila nga dili kadto iya sa Dios, kondili iya mismo kadto sa yawa. Kita n'yo? Ug mga maayong tawo baya sila. Ug nagpakita kadto nga ang maong mga tawo natawo na pag-usab sa Espiritu sa Dios, tungod kay, pagkakita nila sa Kamatuoran pinaagi sa Kasulatan, mibalik man sila sa Dios, mismo, sa gilayon, kita n'yo. Busa, nagpakita ra nga si Satanas gyud kadto nga gapaninguhang mobuhat og usa ka butang sa mga tawo; ingon nga silang tanan diosnon man, og Cristohanon nga mga tawo.

³⁵ Ug daghan kanila ang nakaingon sa ako, "Igsoong Branham, aduna kami'y mas daku na nga pagsalig sa imoha karon kaysa kaniadto."

³⁶ Tungod nakita n'yo, ania, sa gasa nga gihatag kanako sa Dios, unsa ma'y mahimo kong buhaton pinaagi niana? Ipayukbo ang nasud, o, ang mga tawo. Ang ginatawag nato nga *usa ka nasud*, dili man ang "kosmos" dinhi, nga—nga panglawog lang ug uban pa. Ang buot kong ipasabot ang mga Cristohanon, ang tinuod nga magtotoo, ang pinakamaayo sa. . . . Kon maghisgot ta og *nasud*, ang atong ginawali kon ingon-ana mao ang mahitungod sa "natawo na pag-usab nga katawohan," mao kana ang atong ginahisgotan, nga nasud. Dili ang si bisan kinsa na lang dinhi, nga ingon ka hugaw ug malaw-ay dinhi sa kalibutan nga atong gikapuy-an, og sila gayu'y—sila gayu'y mga abog ra sa yuta nga mosumbalik mismo sa pagka-abog. Ang ginapahinungdan ko mao ang natawo na pag-usab nga mga Cristohanon, mga tawo nga tinuod gayud nga mga Cristohanon.

³⁷ Ngani ginahulat ko nga may tawo nga mangsaway pag-usab sa ako mahitungod sa usa ka butang. Adunay miduol sa ako dili pa lang dugay, ug miingon, "Ang mismong ideya, nga nangluwa sa yuta si Cristo, og pinaagi sa Iyang luwa, naghimo Siya'g lapok ug gipahid kadto sa mga mata sa usa ka tawo." Ingon pa, "Pagkahugaw, pagkaluod gayud niadto, nga mangluwa Siya, og gamiton ang Iyang luwa nga gikan sa Iyang baba! Pagkahugaw

gyud niadto, nga mangluwa sa yuta, ug maghimo'g lapok ug ipahid dayon kadto sa mga mata sa usa ka tawo.”

Ingon ko, “Pero miuli baya siya nga makakita na.” Kita n'yo, ingon niana.

³⁸ Ug ang mao mismo nga tawo! Aduna man sila'y giablihan nga usa ka lulinghayawan kon diin managhubo ra ang mga tawo didto duol sa akong balay, kabalo mo, usa ka swimming pool. Ug—ug kadto nga tawo mipalit og tiket para sa kada usa sa iyang mga anak aron moadto didto ug mangaligo niadto nga ligoanan. Ug siya ug ang iyang asawa miadto, usab, didto sa maong ligoanan. Pasensya na, mga igsoon kong babaye. Pero may mga kababayan-an nga nagapangaligo didto, mga usa ka gatus, o duha ka gatus, ka mga kababayan-an; kada adlaw, diin atua ang tanan na nga mga hugaw ug mga ingon-anang butang, ug ang mga kababayan-an sa karong panahon, nagapangaligo didto niadtong tubiga, nga may mga hugaw ug mga luwa nga gikan sa ilang mga baba, ug ila kadtong matulon ug ikulihad ra pud. Mao nga gusto ko hinoon nga iya akong sawayon, kita n'yo.

³⁹ Ingon pa sila, “Kung—kung sa karong panahon pa nabuhi si Cristo, nan basin ila nang gipadakop Siya tungod niadtong mahugaw nga butang.”

⁴⁰ Pero unsa man diay *kana*? Sigurado ko nga nasabtan ninyo ang buot kong ipasabot. Manglusbog sila mismo didto sa maong ligoanan, ug daghan kanila ang adunay mga balatian, nga syphilis, gonorrhoea, ug tanan nang uban pa, didto mismo. Ug mangluwa pa gyud gikan sa ilang baba, ug tanan nang ingon-niana, ug unya mangaligo didto nga ingon-adto. Ug ingon niana ba ang limpyo, mao ba?

⁴¹ Busa, oh, grabe, na kining adlaw nga atong gikinabuhian, igsoong lalaki, igsoong babaye! Panahon na gyud para sa Pag-abot sa Ginoo! Ug ang Iglesia adunay usa na lang ka paglaum, ug kana mao ang Pag-abot sa Ginoo.

⁴² Bueno, dili nako mapugngan kanang mga butanga; dili na man kinahanglan. Tungod gipanagna na man sa Biblia nga mahitabo gyud ang mga ingon-niana dinhi. Dili ko kana mapugngan. Apan gusto ko nga ang akong tingog marekord sa Langit, nga batok ako niana, pag moabot na ang panahon sa Paghukom. Batok gyud ako niana.

⁴³ Nagatoo gihapon ako nga kining Biblia mao ang Pulong sa Dios. Kung ingon-niana wala gayu'y unsa pa man sa kalibutan, nga sukwahi Niini, ang makapugong Niini. Ingon nga kining Biblia dinhi, mao man ang Kamatuoran, mao kini ang Pulong sa Dios. Busa karon birahon sa nato ang atong—atong—atong mga layag, ug moangkla kadali diha sa malinawon nga baybayon sa Dalangpanan nga Kapahulayan. Ug—ug mahimo man natong maglayag ugma sa kon asa man, pero moangkla lang sa kita karon ug paminawon ang Tingog sa atong Langitnong Amahan

ingon nga nagasalig kita, nga manulti Siya kanato pinaagi sa Iyang Pulong, karon.

⁴⁴ Ug unyang gabii, ha, andama na ninyo ang unsa mang diyutay nga pangutana ninyo. Bueno, dili usa ka butang nga makapasakit sa kang kinsa man. Kung ingon-ana man ang buhaton n'yo, nan kana'y. . . Dili nako tubagon ang ingon niana, sa sugod pa lang, kita n'yo. Kondili, *mora'g-ingon niini*, ang isulti n'yo, “Bueno, karon, kung buhaton nako ang usa ka butang, miingon ba ang Dios nga angay namong buhaton kini?” O, kabalo na mo, sa diyutay'ng mga pangutana sa inyong kasingkasing. O kaha, “Adunay mga gasa nga nagapamuhat pinaagi kanamo, Igsoong Branham, ug ipapamuhat ba namo ang mga niini sa *ingon niini* nga paagi o *ingon niana* nga paagi? O, unsa ba ang angay namong buhaton?” Basta butang nga mahimo ko kamong tubagon diha sa Kasulatan, nakita n'yo. Pagsulat lang mo og mubo. Ikalipay nako. Ug kung wala man, nan maghisgot na lang ko og usa ka hilisgotanan, ug magwali sa inyoha unyang gabii, kon itugot sa Ginoo. Dominggo man karon, ug ako'y. . .

⁴⁵ Niadtong miaging Dominggo diay moadto unta ako sa ila ni Igsoong Cauble. Ug nadungog ko ang bagting sa kampanilya niining simbahan, ug naglakaw-lakaw sa ko sa may nataran. Pero wala gyud ko makaagwanta. Mao kadto. Nadungog ko man kamo, mao nga ako—ako—mianhi gayud ako.

⁴⁶ Busa karon iduko nato ang atong mga ulo ug makig-istorya sa atong Magbubuhay, ug pagkahuman mag-ampo. Aduna ba kaninyo'y may espesyal nga paghangyo? Ipataas lang ang inyong mga kamot, og moingon lang, “Ako. . .” Ipahibalo lang kana. Nasayod ang Dios kung unsa ang anaa sa inyong kasingkasing. Karon hinumdumi lang ninyo ang inyong hangyo.

⁴⁷ Labing Balaan nga Dios, Nga naglalang sa Kalangitan ug yuta pinaagi sa Pulong sa Imong baba, pinaagi sa mga hunahuna sa Imong panghunahuna, nagaduol kami sa Imong Presensiya, pinaagi ni Jesus Cristo, nga among Ginoo, aron magpasalamat Kanimo sa tanan-tanan nga Imong gibuhay para kanamo. Ug mapasalamaton kaayo kami nganha Kanimo, Ginoo, niining buntaga, nga masayran kung asa na kami, nga masayran ang among posisyon niining buntaga, ug ang kasaysayan sa panahon, ug ang panahon nga umalabot. Hingsayran namo karon, nga pinaagi sa grasya sa Dios, nahugasan na kami sa Dugo sa Kalbaryo, mao nga andam na kami, nga may pagtoo sa among mga kasingkasing, aron tagboon Siya kon ugaling moabot man Siya karon. Moingon kami, “Hinaut unta, umanhi Ka na, Ginoong Jesus.”

⁴⁸ Ug makita na namo nga nagkatipun-og ang sala, hangtud nga daw sa nagasarasay na ang kalibutan tungod sa epekto sa sala. Grabe na gayud ang pag-inom-inom og makahubog

ug pagsugal, ug mga pagpatuyang ug ang paghubobubo, ug Oh Dios, ang kalaw-ayan, ug kahugawan ug kahilasan sa mga tawo. Ug sila, kung maamgo lang gyud unta nila, Ginoo! Ang ginabuhat sa mga tawo, nga nanagpangbisti og sama nianang mga mugbo'g malaw-ay nga bisti, ug manggawas dinha sa dalan, naamgo ba kaha nila nga sila walay lain kondili mga insekto ug abog lamang, nga tingali'g sa sunod nga semana kaonon na sa mga insekto kanang lawas nga ila gayu'ng ginahimaya? Naamgo ba kaha nila nga kaonon ra kana sa mga ulod, ug ang ilang kalag mamaatua didto sa usa ka Eternidad nga walay Dios, walay Cristo, walay paglaum, nga nagakaunlod sa hilabihan gayud nga pagkawalay-paglaum, og sigurado gayu'ng pagapuohon sa Iyang Pag-abot? Oh Dios, hatagi intawon kami og mga tingog sa—sa pasidaan, aron nga mapasidan-an namo ang matag kalag mahitungod niining katalagman nga ilang pagadangatan.

⁴⁹ Ubani kami karong adlaw. Hatagi kami og “mga pulong sa kaalam,” sama sa gikaingon kaniadto ni Solomon sa Ecclesiastes, nga kami'y mamahimong “maalamon nga mga magtutukod,” nga kami'y mamahimong “mga magbalantay sa niini nga kongregasyon.” Ug ginaampo namo, Ginoo, nga sa pagpangita namo og mga pulong nga igasulti, aron ang mga niini mamahimo—ang mga niini mamahimong hawud nga mga pulong nga magatandog sa kasingkasing dinhi nga nanginahanglan karong buntaga.

⁵⁰ Wala kami mianhi ug nanagkatigum sa silong niining mainit nga atop karong adlaw, aron lang magpakita, kondili nanganhi gyud kami tungod kay gihigugma man Ka namo, ug tungod kay ginatinguha sàb namo nga makapatalinghug Kanimo. Ikaw ang among Hinigugma nga amo gayu'ng gihigugma, ug ginatinguha namo nga mapatalinghugan ang mga Pulong nga gikan Kanimo. Ngani mapasalamaton kami tungod sa mga butang nga amo nang nadungog. Kini'y magapabilin gyud og dugay nganhi kanamo. Karon ihatag Mo unta kanamo ang bahin nga Imong giandam para kanamo niining adlaw, samtang padayon kami nga nagapaabot Kanimo. Amo kining ginapangamuyo sa Ngalan ni Jesus, ug alang Kaniya. Amen.

⁵¹ Karon kini'y. . . [Nagasulti og laing mga pinulongan ang usa ka igsoong babaye, nagahatag pud og paghubad ang usa ka igsoong lalaki—Ed.]

⁵² Mapasalamaton gyud kita tungod niini nga mga paghimaya gikan sa Espiritu, ginasultihan kita niini ug ginapasidan-an kita nga matikdan gayud ang mga Pulong nga mahimong isulti kanato sa Balaang Espiritu karong adlaw. Ug wala kita mahibalo sa kung unsay Iyang gikatagana para kanato, apan nasayod kita nga aduna gayu'y butang nga Iyang igapahayag. Tingali'g usa ka pangutana sa inyong hunahuna, nga isulti Niya pinaagi niini. Mahimo nga isulti Niya kana pinaagi sa Mensahe niining buntaga. Mahimo pud nga isulti Niya kana sa panerbisyo

unyang gabii. Siya, sa kon asa man karon, ginapaninguha man Niya nga, daw sa, pasidan-an ang si kinsa man para dawaton ang mga Pulong.

⁵³ Karon sa pag-abli sa sinulat nga Pulong, moadto kita sa Basahon sa Exodo, para sa leksyon pang-Sunday School.

⁵⁴ Aduna ba kamo'y buluhaton sa pagbautismo? [Nagaingon si Igsoong Neville, "Wala, alas sais pa unyang gabii."—Ed.] Wala diay. Ipahigayon ang buluhaton sa pagbautismo sa alas sais unyang gabii.

⁵⁵ Moadto na kita sa ika-17 nga kapitulo sa Exodo, ug magsugod sa—sa ika-5 nga bersekulo, sa hunahuna ko, ika-5 ug ika-6 nga bersekulo sa ika-17 nga kapitulo sa Exodo.

Ug ang GINOO miingon kang Moises, Lumabay ka sa atubangan sa katawohan, ug dad-a uban kanimo ang mga anciano sa Israel; ug ang imong sungkod, nga imong gilambos sa suba, kupti kini sa imong kamot, ug lumakaw ka.

Ania karon, ako magatindog sa atubangan mo . . . didto sa ibabaw sa bato sa Horeb; ug . . . imong bunalan ang bato, ug gikan niini motubod ang tubig, aron makainom ang katawohan. Ug mao kini ang gibuhat ni Moises sa atubangan sa mga anciano sa Israel.

⁵⁶ Karon kung pagaulohan ko kining hamubong teksto nga pang-Sunday School, buot kong gamiton kini ingon nga hilisgotanan para sa leksyon niining buntaga, *Ang Tubig Nga Kanunay'ng-Anaa Gikan Sa Bato*.

⁵⁷ Nasayod man tà nga sa una pa ang Israel usa na ka ehemplo sa kasaysayan para sa iglesia. Tungod nga, ang Israel mao ang katawohan sa Dios hangtud nga nanggawas sila sa Egipto, ug pagkahuman nahimo sila nga iglesia sa Dios tungod kay nahimulag man sila gikan sa tanang uban pa sa kalibutan.

⁵⁸ Ug sa diha nga mahimulag sàb kita gikan sa tanang uban pa sa kalibutan, nan mahimo kitang iglesia. Apan samtang nahilambigit pa kita sa tanang uban pa sa kalibutan, kung ingon-ana dili kita ang iglesia. Karon nagasalig ko nga mituhop kana sa halawom gayud, og napahimutang sa puwesto niini. Kita n'yo, dili kita ang iglesia gawas kon mahimulag úna kita sa kalibutan. Ihimulag nato ang atong mga kaugalingon, manggawas kita gikan sa mahugaw nga mga tawo, dili kita makighilambigit kanila, ug dili kita angay'ng moambit sa ilang mga sala. Ayaw kamo pagpahiangay sa mga dili-magtotoo, kondili ihimulag n'yo ang inyong kaugalingon gikan sa mga butang nga iya sa kalibutan.

⁵⁹ Ug sa dihang atua pa sa Egipto ang Israel, sila'y katawohan sa Dios. Pero sa dihang gitawag na sila pagawas, o nagkaaduna og exodo, napahigawas, nan gitawag sila nga iglesia, tungod

kay niadtong panahona gihimulag man nila ang ilang mga kaugalingon gikan sa tanang uban pa sa kalibutan.

⁶⁰ Ug ang mismong pulong nga *iglesia* nagakahulogan og “tinawag pagawas.” Ang *exodo*, “ninggawas.” Ngani ang matag usa sa ato, ingon nga mga Cristohanon, nagkaaduna man sàb og exodo sa atong kinabuhi. Adunay panahon kon diin gitawag kita pagawas gikan sa atong mga kaubanan, gitawag pagawas gikan sa mga tawo nga kaniadto atong naka-fellowship, ug nahimo tàng lahi na nga klase sa mga tawo, aron magkinabuhi kauban ang lahi na nga klase sa mga tawo nga lahi ang pagpanglihok ug lahi ang pagpanulti. Usa kadto ka exodo sa atong kinabuhi.

⁶¹ Maayo kaayo nga ehemplo ang gihatag sa Israel kanato, kaniadtong gitawag sila sa Dios pagawas. Nagkaaduna sila og exodo, ug nanggawas gikan sa—sa mga tawo sa kalibutan, ug nahimong usa ka gihimulag nga nasud, alang sa Dios, usa ka talagsaon nga katawohan. Nanglakaw sila ilalum sa landong sa lingkoranan sa kalooy. Nagkinabuhi ug nanglakaw sila pinaagi sa gamhanang Haligi nga Kalayo. Ug gipahigawas sila sa Dios gikan sa Egipto, paingon sa yuta nga Iyang gikasaad.

⁶² Ug, sa niini nga exodo, gihatagan sila og usa ka espirituhanon nga lider, usa ka lider, nga mao si Moises, nga usa ka halangdon og dinihogan nga propeta nga usa—usa ka gamhanang tawo. Usa siya ka diosnon nga tawo, natawo siya ingon nga usa ka diosnon nga tawo. Gitawag siya sa Dios gikan sa iyang inahan, bisan sa wala pa kadto nga panahon; gitagana na siyang daan sa Dios sa wala pa ang pagkatukod sa kalibutan, aron mahimong usa ka lider niadto nga henerasyon, aron ihatud kini nga exodo ngadto sa mga tawo.

⁶³ Dinhi usa ka higayon kaniadto, namulong ako sa gagmay'ng mga bata dinhi sa tabernakulo, ug nagwali ko og hamubo nga wali para kanila; ug nag-estorya, o naghatag og diyutay'ng paghulagway kung unsa si Jochebed, kung unsa nga nag-ampo gayud siya, siya ug si Amram, ang amahan ni Moises, mahitungod sa usa ka butang nga buhaton aron sa pagluwas sa katawohan. Ug nakakita si Amram og panan-awon nga nagatindog ang Dios, o ang usa ka Manulonda, nga nagatudlo sa amihanan, ug gisulti kaniya kung unsa ang mahitabo. Ug natawo ang batang si Moises. Ug wala gyud nila kahadloki ang mga balaod sa hari, ni ang mga panghulga man. Tungod nasayod sila nga anaa man sa kamot sa Dios si Moises, ug okey na kana. Husto. Bisan unsa pa ang gisulti sa hari, unsa pa ang gisulti sa kalibutan sa pulitika, unsa man ang gisulti ni kinsa pa man, nasayod gyud sila nga si Moises anaa sa kamot sa Dios. Busa wala sila nahadlok nga ipaanod siya, didto sa taliwala mismo sa mga buaya; nga nanggitambok na gayud tungod sa gagmay'ng Hebreohanong mga bata, nga gipangpakaon ngadto sa mga buaya. Ug bisan pa niadto gisulod si Moises sa usa ka gamay'ng arka ug gipaananod ngadto mismo sa taliwala sa mga

buaya, didto gyud mismo sa taliwala nila. Tungod, wala man sila'y gikahadlok, ingon nga nasayod sila nga anaa sa kamot sa Dios si Moises.

⁶⁴ Bueno, karon, kung masabtan lang unta nato ang mao mismong panghunahuna, nga ang atong gamhanang Lider, ang Balaang Espiritu, gipadala Siya sa Dios, ug Siya mao ang atong Lider, ug bisan unsa pa'y isulti sa kalibutan, ug bisan pirmi pa nila kamong kataw-an ug biaybiayan, nagasunod gihapon ta sa atong Lider! Gipadala man sa Dios ang Balaang Espiritu aron mamahimong atong Lider. Kita n'yo? "Sa diriyut lamang panahon ug ang kalibutan dili na makakita Kanako. Apan kamo makakita Kanako, kay Ako magauban kaninyo, bisan sa sulod ninyo, hangtud sa katapusan sa kalibutan." Busa, nagauban kanato ang atong gamhanang Lider, ang Balaang Espiritu. Mao nga gikinahanglan gyud natong sundon kini nga Lider ug buhaton mismo ang ginaingon Niya nga pagabuhaton. Ug dili gayud kita ipahisalaag sa dalanon sa niini nga Lider, kondili ipapabilin Niya kita mismo diha sa dalanon sa Kasulatan sa tanang panahon. Tungod dili man gayud Siya motipas ngadto sa *usa* ka bahin para sa *usa* ka butang, ug sa *niini* nga bahin na sàb para sa *usa* ka butang. Magpabilin ra gyud Siya mismo sa dalanon sa mga Kasulatan.

⁶⁵ Ug si Moises kaniadto aduna pu'y ruta nga kinahanglan niyang paagihan sa Israel, ug kinahanglan sundon patabok didto sa Dagat nga Mapula, latas sa Jordan, paingon mismo ngadto sa yutang saad, didto mismo latas sa kamingawan. Ngani dili man si Moises ang mitipas. Dili pud ang Dios ang mitipas. Kondili ang mga tawo mismo ang mitipas, nga mao'y naghinungdan sa problema. Busa, atong palandungon kining mga butanga karon. (Pasensya na.)

⁶⁶ Si Moises, ingon nga dinihogan nga lider. Sa katapusan, kaniadtong naipakita niya sa mga tawo, pinaagi'g mga ilhanan ug mga katingalahan, nga Dios lamang ang makabuhat, namuhat siya niining mga ilhanan ug mga katingalahan sa atubangan sa mga anciano sa Israel, ug sa atubangan sa Israel, hangtud nga nakumbinsi sila nga kini nga Moises mao mismo ang tawong dinihogan nga mao'y magpahigawas kanila gikan niini nga nasud, paingon niadtong maayo nga yuta nga gikasaad kanila. Dayon sa dihang nasaksihan nila kadtong gamhanang mga butang nga gipamuhat ni Moises sa ngalan sa Dios, andam na sila nga mosunod kaniya. Ug gipahigawas niya sila, gipangunahan sila latas sa Dagat nga Mapula, mitabok, ug nanglakaw sa mala nga yuta, paingon sa pagpanaw sa kamingawan, nga ang buot ipasabot panahon sa mga pagsulay.

⁶⁷ Sa higayon nga dawaton sa *usa* ka tawo si Cristo ingon nga iyang Manluluwas, ang tanan daw sa maayo kaayo. Apan, kini nga tawo sa dili pa siya modangat sa bautismo sa Balaang Espiritu, kining tawhana, kinahanglan niya *una* nga moagi

sa proseso sa pagpabalaan. Kinahanglan niyang moagi sa panahon sa pagsulay sa iyang kinabuhi. Kamong tanan miagi man pud niana. Moagi siya niining panahon sa pagsulay. “Ang matag anak nga nagaduol sa Dios, kinahanglan una nga hampakon, mapanton, kastigohon. Ug kung dili kita makaantus og pagpanton, nan nagapakita lang nga dili kita mga anak sa Dios; kita’y mga anak sa gawas, ug dili mga anak sa Dios,” ang ingon sa Biblia. Apan kung maantus nato ang pagpanton, nga nanghibalo nga “ang tanan nga mga butang masigtabang alang sa ikaayo niadtong mga nahigugma sa Dios,” kung ingon-niana kita gayu’y mga anak nga lalaki ug mga anak nga babaye sa Dios, dayon selyohan na Niya kita sa Balaang Espiritu hangtud sa adlaw sa atong katubsanan. Kita n’yo, ingon-ana ang pagpanton, ang kapit-os, ang butang nga atong pagaagian.

Ug ang Israel, ingon nga usa ka tipo sa kasaysayan, gikinahanglan pud nilang agian kini nga pagpanton.

⁶⁸ Bueno, kaniadtong atua pa sila sa Egipto, ug gipadala sa Dios si Moises. Ug gituy-od niya ang sungkod, ug nanungha sa yuta ang mga pulgas ug mga kuto. Gituy-od niya kadto paingon sa adlaw, ug misalop ang adlaw. Gituy-od pud niya kadto sa ibabaw sa katubigan, ug nahimong dugo ang tubig. Bueno, niadtong atua na ang Israel sa Canaan. . . didto sa—sa Gosen, nagkaaduna gyud sila og mahimayaon nga panahon; wala nagasalop ang adlaw, walay mga hampak nga miigo kanila; aba, nagkaaduna gayud sila og mahimayaon nga panahon!

⁶⁹ Sama ra sàb kaninyo sugod kaniadtong naluwas kamo. Ang tanan-tanan, lahi na ang pag-awit sa mga langgam, ug ang tanang tawo malulot gayud. Ug, oh, pagkanindot, maayo gayud ang tanang butang sugod niadtong naluwas kamo! Pagkahuman miabot na ang panahon sa pagsulay, ang pagpanton, ang panahon sa pagpabalaan, ginapabalaan ang inyong kaugalingon gikan sa mga butang nga iya sa kalibutan, “nga ginasalikway ang mga kabug-at nga sa dakung kasayon nagapiit paglikos kaninyo.” Kamo, nga lalaki, gikinahanglan n’yo nang undangan ang inyong pagpanigarilyo, undangan ang inyong pag-inom og makahubog, undangan ang inyong pag-adto-adto sa bilyaran, og ang inyong pang-tibuok gabii nga party-party sa pagdula og baraha. Ang tanan niana nga mga butang, tungod nga gikinahanglan n’yong balaanon ang inyong kaugalingon gikan sa mga niana, pinaagi sa pagtoo sa Dugo ni Jesus Cristo. Ginapabalaan ang inyong kaugalingon! Kamo sàb nga mga kababayan-an gikinahanglan n’yong patas-on na ang inyong buhok, patas-an na ang inyong mga bisti, ug lahi na ang inyong pagpanglihok kay sa kaniadto. Panahon kana sa pagpabalaan! Sa daghang higayon ang mga tawo nagarebelde ug nagapamalik; bueno, dili man ingon-niana ang usa ka anak sa Dios, kita n’yo. Ang anak sa Dios diritso gayud nga nagatan-aw ngadto sa Kalbaryo, ug nasayod nga alang kana sa iyang ikaayo.

⁷⁰ Busa sa pagpadayon sa panahon, dinha pud nahitabo ang dakung pagtipas, sa Israel. Niadtong panahon nga nagkatapok na sila, dayon ang mga tawo hinay-hinay pud nga nangtipas, gikan sa usa ka bahin ngadto sa pikas bahin. Dayon sa ilang pag-inistoryahanay, “Bueno, mamalik na lang unta kita didto sa Egipto. Ang atong mga kalag giluoed na gyud niining somo na nga tinapay.” Sa laing pagkasulti, kung ibasi ko kini karon sa kasaysayan, ingon-ana ang ilang gipanulti.

⁷¹ Pero karon sa moderno nga panahon, basin ingon na niini, “Oh, matag Miyerkules na lang sa gabii, panagtigum na pud sa pag-ampo! Matag Dominggo sa buntag, manimba na usab! Unsa na pud kaha’y atong madungog? Mao ra gihapon; motindog ang magwawali ug magwali; may mga panag-awit; balik-balik na lang.” Kita n’yo, kung ingon-niana nagaadto lang diay kamo tungod ra sa katungdanan. Dili gyud kamo ingon nga usa ka magsisimba. Ang usa ka magsisimba nagaadto didto aron mosimba, aron ipahayag ang iyang kaugalingon sa atubangan sa iyang Dios, aron dayegon ang Dios tungod sa Iyang pagkamaayo; og sa matag Pulong, nagapanghawid gyud siya Niini.

⁷² Sama lang sàb sa paghigugmaay. Kung nagauban ka sa usa ka dalaga tungod ra kay kahibalo ka nga katungdanan kini, o kaha nagauban ka sa usa ka olitawo, kaniadtong mga batanon pa kamo. “Gusto man gud ni mama nga mouban ko sa niini nga lalaki, pero dili man gyud ko ganahan sa iyaha.” Wala gyud ka’y interes sa iyang pagpamisita para makigkita sa imoha. O, mao ra usab kana sa dalaga ngadto sa olitawo, o sa olitawo ngadto sa dalaga. Kon mouban ka sa dalaga, nan laayon ka ra sa iyaha; gusto ra man gud ni mama nga mouban ka sa maong dalaga tungod kay siya mao ang klase sa babaye nga gusto ni mama. Nasabtan n’yo, wala kamo’y interes; tungod wala ma’y paghigugma sa usa’g usa. Mao nga dili ka’y kaikag, ayaw nimong mangandam, tungod dili man gyud nimo gusto nga makigkita sa maong dalaga. Ug usa kana . . . Aba, salikwaut kanang ingon-ana. Ug pag mamisita pud ang lalaki para makigkita sa imoha, aba, mas gustohon mo nga dili siya magdugay, og mouli na.

⁷³ Ingon niana usab pagmoingon mo, “Nganong dugay man kaayo siya magwali? Unsa na lang diay *kining* mga butanga, ug ang tanan niini?” Kita n’yo, wala kamo nahigugma.

⁷⁴ Apan kon nagapanghawid gayud kamo sa matag Pulong, sama sa pasidaan nga ginahatag kaninyo sa Espiritu karong buntaga, kita n’yo, “Manghawid sa matag Pulong.” Tingali’g mao kana ang dugay na Niyang ginasulti sa inyoha. Manghawid mismo! Ingon nga Kini mao’y Kinabuhing Walay Katapusan, ang matag Pulong sa Dios. Mao nga kalipay gayud nga moadto sa simbahan, bisan unsa pa ang kahintang. Bisan mainit, tugnaw, mga walay-pagtagad, bisan pa kon nagalalisay ang mga tawo, nanagbagulbol, bisan unsa pa ang ginabuhat nila, kalipay gyud gihapon nga makapatalinghug sa Pulong sa Ginoo. Kung ingon-

niana nahigugma kamo kang Cristo, kita n'yo, gusto n'yo gayud nga mosimba.

⁷⁵ “Bueno, pinangga, Domingo sa buntag na usab, siguro kinahanglan na natong ligoon ang mga bata ug moadto na didto. Grabe, pagkalaay gyud!” Kita n'yo, wala kamo nahigugma.

⁷⁶ Pero kung nahigugma gyud kamo, dili na kamo makahulat nga moabot ang Domingo sa buntag, nagahinam-hinam gayud kamo nga moadto didto uban kanila. Ug kon didto na ta, ug sa pagbiya na . . . Ang mga katawohan sa Dios, dili gyud kamo laayon sa ilaha. Aba, sila'y—sila'y mga igsoong lalaki ug mga igsoong babaye man gud. Maingon sa ginasulti ko kaniadto, “Mora kamo og ingon ka lapot sa Sorghum nga molasses sa mabugnaw nga buntag.” Kana—dili kana molanay, nagapilit ra kana, kabalo na mo, lapot gyud kaayo. Bueno, kana'y medyo dili maayo nga pahayag, pero kana'y—kana'y—kana'y para masabtan n'yo lang ang buot kong ipasabot, nakita n'yo. Magkahiusa kamo. Ug kon mas nagakabugnaw, mas nagahugot hinoon ang pagkatapot. Ug ingon niana pud unta kita. Kon mas nagakabugnaw . . .

Kon talikdan man sa mga higala sa kalibutan,
Nan mas hugtan ko pa ang pagpanghawid
Kaniya!

⁷⁷ Ug ang nagapahigugma kanato, sa usa'g usa, dili tungod kay sa kung kinsa kita; kondili si Cristo nga ania sa usa'g usa sa ato, mao nga kita nagahigugma, nakita n'yo. Ang Dios mismo kini nga ania sa atong mga kasingkasing, mao nga kita nagahigugma. Mao nga gusto gyud nato nga magkatigum. Pirmi natong ginaawit kaniadto ang karaang himno:

Panalanginan ang higot nga nagabugkos
Sa atong mga kasingkasing sa Cristohanong
gugma;

Ang pagpakigkauban sa parehong hunahuna
Sama nianang sa Kahitas-an. (Kita n'yo?)

Ang pagpakigkauban sa parehong hunahuna
Sama nianang sa Kahitas-an.

Sa atubangan sa Trono sa atong Amahan,
Ginabubo nato ang atong mainiton nga mga
pag-ampo;

Ang atong mga kahadlok, ang atong mga
paglaum, ang atong mga katuyoan usa ra,
Ang atong mga kahupayan ug atong mga
kahingawa.

⁷⁸ Kita n'yo? Oo, sir! Pag may nadawat nga panalangin ang usa, malipayon kitang tanan tungod niana. Kon masulob-on ang usa, masulob-on pud kita uban niya. Gusto nato—nato nga nagkahiusa tang tanan. Bueno ingon niana gyud unta kita.

⁷⁹ Ug ingon niana sàb unta ang Israel kaniadto. Pero nahimo man hinoon kadto nga kabug-aton, “Oh, pirmi na lang kining magaan nga tinapay!” Tinapay sa mga Manulonda, “Bueno, unsa ma’y labot nato niining magaan nga tinapay? Wala na man ganahi ang among mga kalag niining butanga! Ug sayup gyud ang tanan. Ug—ug kining manna nga nagakahulog matag gabii, aba, mas gustohon pa namo ang mga ahos ug sibuyas gikan sa Egipto.” Nakita n’yo, dili andam ang ilang mga kasingkasing para niadto nga pagpanaw.

⁸⁰ Ug kon ang usa ka lalaki o usa ka babaye hinay-hinay na ganing magbagulbol bahin sa pag-adto sa simbahan, nga sila’y gikapoy na kaayo sa pag-adto sa simbahan, nan dili sila andam para sa pagpanaw. Tinuod kana. Aduna gyu’y sayup sa kung asa man.

⁸¹ Oh, kon gihigugma n’yo ang Dios, ug gadahum nga mahiadto kamo sa Langit, ug kamong tanan dungan nga mangadto:

Grabe nga pagpakig-fellowship, grabe nga
Balaanong kalipay,
Nagasandig sa walay-katapusan nga bukton;
Oh, pagkamapanalanginon nga pakigdaít
kauban ang akong Ginoo sa haduol,
Nagasandig sa Iyang walay-katapusan nga
bukton.

Pagkaanindot . . . Ginaawit nato kini nga mga himno.

Nagapakig-ambit kita sa mga kagul-anan sa
usa’g usa,
Ginapas-an tà ang mga kabug-aton sa usa’g
usa;
Ug sa kanunay nagadagayday alang sa usa’g
usa
Ang luha nga nagapakigduyog.
Sa higayon nga kita magkabulagbulag,
Nagahatag kini kanato og kasubo sa
kinasuloran;
Apan sa sulod sa kasingkasing kita sa gihapon
magkauban,
Ug nagalaum nga magkita-kita pag-usab sa
sunod nga higayon sa panagtigum sa pag-
ampo. (Oo, sir, sa sulod sa kasingkasing
magkauban gihapon!)

⁸² Karon andam na kamo para sa pagpanaw, kita n’yo, andam na kamo nga moadto paingon sa Yutang saad. May mga panahon man sa pagsulay, anaa man ang makuyaw nga dapit; ang kamingawan, og mga panahon sa pagsulay.

⁸³ Ang Israel, sa panahon nga siya gisulayan, midangat hinoon siya sa pagpakig-away ug pagpakiglantugi, ug wala na ganahi sa tinapay. Ug gusto na nilang mamalik sa Egipto.

⁸⁴ Ug dayon hinay-hinay na silang nanagbagulbol sa ilang lider. Oh, nangahadlok sila nga basin gipangunahan ra niya sila nga masaag; human nga gipakita na niya mismo nga usa siya ka lider, ug bisan nagpamatuod na ang Dios nga siya mao ang lider. “Bueno, tingali’g nanglihok kita nga medyo panatiko na. Ug—ug basin nangasaag na ta, og nasayup gayud,” o mora’g ingon niana, kita n’yo, nag-inistoryahanay sila batok sa Dios ug batok kang Moises, batok sa Dios ug sa Iyang lider.

⁸⁵ Bueno pagmoabot kita sa punto, nga moingon, “Wala ko kabalo kung ang buot ipasabot ba sa Pulong *Ingon niini*, o dili,” ug, “Wala man ko’y hibangkaagan sa Balaang Espiritu; mao nga medyo may pagduhaduha pa ako bahin Niana. Pero kabalo ko nga may uban nga wala pu’y hibangkaagan.” Bueno, bumalik ka sa Egipto. Kita n’yo?

⁸⁶ Apan kung determinado gayud kamo nga magpabilin sa dalanon, magpabilin sa niini nga Lider, ang Balaang Espiritu, nan magpabilin gyud mo sa Pulong. Ug kung magpabilin kamo sa Espiritu, nan ipapabilin pud mo Niini sa Pulong. Husto kana. Dalhon kamo Niini mismo sa dalanon, sa dalanon sa Pulong. Ug ayaw kamo’g kahadlok Niini. Dili man mo pasakitan Niini, tabangan hinoon mo Niini kung masakitan kamo. Pagaayohon Niini ang tanang kasakit, ayohon gayud sa Balaang Espiritu.

⁸⁷ Karon hingsayran nato nga, sa niini nga dalanon, human nga nahimo silang ingon-niini, midangat sila sa usa ka dapit sa Horeb. Ug ang H-o-r-e-b, Horeb, dayon hingsayran nato. . . Atong isaysay og ayo kana nga ngalan. Dinha ang—ang ngalan nga *Horeb* nagakahulogan og usa ka “mala nga dapit” o usa ka “disyerto.”

⁸⁸ Ug ngani kon mobiya kita sa pagpakig-fellowship sa usa’g usa sa iglesia, ug sa pagpakig-fellowship sa Balaang Espiritu, ginadala kita niana sa usa ka mala nga dapit, sa usa ka disyerto, nga walay kinabuhi, og tunokon ang tanang mga tanum. Kita n’yo, usa—usa ka disyerto, nga may usa ka gamay’ng cactus nga may mga tunok. Kabalo ba mo kung unsa kana? Usa kana ka maanindot og medyo mahumok nga dahon nga wala ra gyud natubigan, mao nga tuskig kaayo hangtud nga nahimong tunokon. Ug kon may makita kamo nga ingon niana, tingali’g usa kana ka bililhon nga kalag nga kon nabisbisan unta sa husto, mamahimo unta siguro nga usa ka mahumok nga dahon o ingon niana. Pero imbis nga ingon-ana, nagtuskig hinoon kana hangtud nga nahimong tunokon, nga mangtusok og unsa na lang, kabalo mo, nagapangita og sayup. Pero ang bugtong gikinahanglan niana tubig ra man. Kana lang. Nagkinahanglan lang kana og usa—usa ka rebaybal, o usa ka pagbalata, usa ka pagdasig gikan sa Ginoo. Kana’y—manglimbukad gyud kana, kung ipahimutang n’yo lang kana sa tubig.

⁸⁹ Apan, sila nga mga nagapuyo dinha sa ingon-ana nga dapit siguradong antuson gyud ang mga kahimtang sa maong dapit. Ug sila nga mga nagatinguha nga mopuyo sa ingon-ana nga matang sa kahimtang, kon diin ang tanan may panagbangi ug nagalalisay, ug nagaaway-away ug nagalantugiyay nga ingon niana, sige, sa ingon-ana gyud nga kahimtang kamo magkinabuhi, ingon-ana gyud. Pero dili man kita angay'ng magkinabuhi dinha, dili kita kinahanglan nga magpuyo dinha.

⁹⁰ Bueno, kining Horeb mao ang dapit kon diin nadiskurahi ang Dios sa mga tawo, tungod kay naglatagaw man sila sa niini nga dapit ug nahidangat sa maong kahimtang. Ug gidala Niya sila didto mismo, tungod ayaw man nilang mosubay sa hustong dalanon. Mingtipas sila gikan sa—sa daku nga dalan, og misimang paingon sa niining daplin nga dalan. Ug naghinungdan kadto nga nagbuhat ang Dios og usa ka butang nga makahahadlok. Siya. . .Naghinungdan nga gisugo sa Dios si Moises para kuhaon ang sungkod nga iyang gigamit para hukman kadtoong nasud, ug bunalan ang Bato, aron magpaagay og tubig.

⁹¹ Karon, aduna gyu'y maanindot nga leksyon dinhi kung masabtan lang nato kini, kita n'yo. Ug tungod nga nahisimang na kaayo kita, ug napaingon na sa kalibutan, ug mga ingon-anang butang, naghinungdan kadto nga giako sa Dios ang paghukom sa kalibutan ug gibunalan ang Kaugalingon Niyang Anak tungod niadto, didto sa Kalbaryo, aron nga maluwas kita. Nasabtan ba ninyo ang buot kong ipasabot?

⁹² Bueno, aron nga madala kining mga tawhana ngadto sa may tubig, human nga nahidangat sila didto, kining mala nga dapit gihimong Kalbaryo. Ug didto gisultihan sa Dios si Moises, ingon Niya, “Dad-a ang sungkod ug ang mga anciano, ug umadto kamo, ug magatindog Ako sa Bato sa atubangan ninyo.” Ug kini nga Bato mao si Cristo. Ug si Moises, pinaagi sa sungkod nga iyang gigamit sa paghatud og paghukom sa nasud sa Israel, iyang gidala kining mao gihapon nga sungkod ug gibunal ang paghukom sa Dios ngadto sa Bato. Kita n'yo? Iyang gipahimutang sa niining sungkod ang mga sala sa mga tawo. Diin, ang mga tawo man unta ang angay niyang bunalan. Pero imbis nga bunalan ang mga tawo, iyang gibunalan ang Bato. Ug ang Bato, pinaagi sa usa ka buhat sa Dios, naghatud og kaluwasan, naghatud og tubig ngadto sa usa ka nagakamatay nga katawohan. Naghatud kadto og kinabuhi ngadto sa naghimalatyon nga katawohan. Ug mao kadto ang gibuhay sa Dios pinaagi sa pagkuha sa Iyang—Iyang sungkod nga mao ang sungkod sa paghukom, ug gibaligtos ngadto niini nga sungkod ang akong mga sala ug ang inyong mga sala; diin kita unta ang angay'ng giigo, apan si Cristo ang giigo; aron nga gikan Kaniya moagay ang *mga tubig*, nga ang buot ipasabot “Espiritu,” ang Balaang Espiritu midagayday gikan Kaniya, aron hatagan

kita og Kinabuhi. Mao nga karon aduna na kita'y Kinabuhing Walay Katapusan. Bueno, kadto nga Bato mao si Cristo. Karon gusto natong matikdan.

⁹³ Daghan na kaayo ko'y nakita nga mga pang-intelektuwal nga paghulagway sa niini nga Bato. May usa akong nakita nga mao'y pinaka kritikal, dili pa lang dugay, kon diin dunay usa—usa ka gamay'ng bato nga atua ibabaw sa usa ka bungtod. Ug—ug si Moises bunalan na unta niya kini nga bato, ug atua pud didto sa ubos ang Israel nga may dala nga tasa, nagakuha sila og mainom nga diyutay'ng mga wisik-wisik nga nagakahulog gikan niini nga bato. Bueno ideya lang kadto sa kung kinsa nga tawo.

⁹⁴ Apan sa dihang nagpaagay kadtong Bato sa mga tubig Niini, sobra duha ka milyon ka mga tawo ang atua didto, gawas pa sa mga baka, mga kamelyo, ug tanan nang uban pa nga nanaginom og binalde-balde nga tubig gikan Niini. Usa kadto ka nagabugwak nga agos nga nagadagayday gikan didto!

⁹⁵ Pero ingon niini ang ginapaningkamotan nilang ihulagway bahin kang Cristo, ang Balaang Espiritu sa karong panahon. “Usa lamang kini ka diyutay'ng wisik.” Kita n'yo, igo lang gyud para motoo kamo nga adunay Dios. Dili.

⁹⁶ Usa kadto ka madagayaon nga Tubig! Ngani miingon si David, “Ang akong copa nagaawas!” Usa man kadto ka makusog nga bul-og sa Balaang Espiritu.

⁹⁷ Gikahadlokang Kini sa mga tawo. Moingon ang ubang mga tawo, “Bueno, medyo nahadlok lang ko nga basin buhaton ko ang *ingon niini* o *ingon niana*, o kung mahitabo man nga medyo mapalawom ako. Aduna man gud ko'y maipakita sa inyo nga napahilayom ra kaayo.” Pero dili gani ninyo maitudlo ang usa nga wala na nakapadayon pa sa unahan. Kita n'yo? Oo, unsa na man lang kadtong mga wala na gyud nakapadayon sa unahan?

⁹⁸ Karon, aduna pu'y mga tawo nga nahimo nang karnal, ingon nga sayup na sa sugod pa lang. Ug—ug dili ang Dios, kondili ang mga tawo nga midangat... Tungod sa dili maayo nga pagpanguna, ug uban pa, mao nga nangasayup sila, ug napaingon sila sa panatisismo. Ug dayon ang tibuok kalibutan, ang ginatudlo kanila sa yawa, “Tan-awa n'yo kana! Tan-awa n'yo kana!”

⁹⁹ Bueno, motindog ako karong buntaga ug itudlo kaninyo kining napulo ka milyon ka pilo nga mga wala pa gyud nakasugod. Unsa man sila? Kita n'yo, tan-awa n'yo ang ilang kahimtang. Tan-awa n'yo ang lalaki nga sama ni Eichmann karon, nga may pinakataas... Moingon sila, “Ang mga pentecostal dili-etikal ug walay-batasan, ug sila'y dili-edukado,” ug uban pa nga sama niana. Tan-awa n'yo si Eichmann, nga usa sa pinaka edukado nga kalalaken-an sa kalibutan. Ug gipamatay niya, ang unom ka milyon nga mga bata ug mga kababayen-an ug mga kalalaken-an, unom ka milyon

nga mga kalag. Siyempre dili ninyo gustong itudlo ang usa ka tawo nga sama niana.

¹⁰⁰ Pero ang usa ka ubos nga tawo nga dili makabasa, halos, tingali'g sayup ang pagkalitok sa pipila ka ngalan sa Biblia, ug, o siguro adunay nasulti o may nabuhat nga sayup, o kaha nasayup, imantala dayon kana sa mga mantalaan sa bisan asa, ug moingon, “Dili sila angay'ng kasaligan.”

¹⁰¹ Kung ingon-ana nga dili kana masaligan, kay ngano ang edukasyon, ang mga ingon-anang butang ug mga intelektuwal nga aduna sila sa karong panahon masaligan ba? Tan-awa n'yo si Adolf Hitler. Tan-awa n'yo ang mga utokan sa kalibutan karon. Tan-awa n'yo sila. Nagaingon ang karaang panultihon, “Ang sarsa para sa baye nga gansa para usab sa laki nga gansa.”

¹⁰² Mao nga ang kinahanglan n'yong buhaton, pinaagi sa Balaang Espiritu, mao ang mahimulag n'yo ang husto ug sayup, ug ilhon kung unsa ang husto ug sayup.

¹⁰³ Karon, nahibaloan nato nga kining Kalbaryo nga aduna sila kaniadto, ug ang mga tubig sa kinabuhi nga mibugwak para sa mga tawo.

¹⁰⁴ Bueno, gadahum ang ubang mga tawo sa ilang mga kasingkasing ug hunahuna, nga nanag-inom ang tibuok Israel, ug pagkahuman gipangkarga na nila ang mga gamit ngadto sa mga kamelyo ug gihigot ang mga monturahan sa ilang mga kabayo, ug uban pa, ug gipangdala ang ilang mga anak ug mipanaw na sa kung asa man, ug gibiyaan na kadtong Bato didto, nga nagadagayday. Sayup kana.

¹⁰⁵ Kadto nga Bato nagasunod man kanila, ug nagasunod pud kanila kadto nga tubig. Karon sa Unang Mga Taga-Corinto, sa ika-10 nga kapitulo, sa hunahuna ko, ug sa ika-11 nga bersekulo, makita ninyo dinha, nga, “Kadto nga Bato nagsunod sa Israel.” Bisana man sila nangadto sukad niadtong adlaw, kadtong Bato nagauban kanila, ug nagasunod kanila ang mga tubig.

¹⁰⁶ Pagkamaanindot nga tipo, ug usa—usa ka maanindot nga pagkupot ug usa ka angkla para sa magtotoo karong panahona, nga mahibaloan nga kadtong Bato nga gibunalan kaniadto, kadtong Tubig nga gibubo kaniadto gikan sa Kalbaryo, nagauban gyud kanato bisan asa man kita! Oh, pagkanindot! Dili na Kini mobalik pa sa usa ka lugar, ug moingon, “Bueno, aduna kita'y Tubig pero kaniadto pang miaging adlaw, didto.” Aduna kita'y Tubig karon, dinhi mismo, tungod kay kadto nga Bato mao man si Cristo! Ug si Cristo mao sa gihapon kagahapon, karon, ug hangtud sa kahangturan.

¹⁰⁷ Kita n'yo, kadto nga Bato nagsunod sa Israel. Dili sila ang nagasunod sa Bato, kondili ang Bato mismo ang nagasunod kanila. Amen. Nagpadayon kaniadto ang Israel sa ilang pagpanaw. May usa lang ka butang ang angay nilang buhaton,

kana ang, magpabilin mismo sa diritso nga dalan, diritso mismo sa yutang saad. Ug ang Bato ug ang tubig nagsunod kanila.

... ang *Bato* nga nagsunod *kanila*: . . .

Mao kana ang ginaingon sa inyo sa Unang Mga Taga-Corinto, sa ika-10 nga kapitulo. Oo.

... ang *Bato* mao si *Cristo*.

¹⁰⁸ Giangkon sa Dios ang mga paghukom para unta sa mga tawo ug gipahimutang ang mga niini kang Cristo, ug gibunalan Siya. Namatikdan ba ninyo, nga may liki sa Bato, sukad niadtong higayona? Ang Bato adunay liki, kon diin gibunalan ni Moises. Ug si Cristo aduna ma'y liki, kaniadtong gibunalan Siya, "Siya gisamaran tungod sa atong mga kalapasan, ug tungod sa Iyang mga labod kita nangaayo." Gikan niadto nga Kinabuhi midagayday ang mga Tubig sa Kinabuhi nga gikalipay nato og ayo karon!

¹⁰⁹ Karon, aron nga maangkon kini nga Kinabuhi, hinumdumi n'yo, ang Kinabuhi ni Cristo nagapabilin sa Iglesia. Alleluyah! Oh, kung maiangkla lang nato ang atong mga hunahuna dinha sa mosunod nga diyes minutos! Dili ginabiyaan ni Cristo ang Iglesia. "Ako magauban kaninyo sa kanunay, bisan hangtud sa katapusan sa kalibutan." Ang mga tawo hinoon ang nagabiya kang Cristo, dili si Cristo ang nagabiya sa mga tawo. Ginabiyaan Kini sa mga tawo, tungod sa ilang dili-pagtoo. Sila ang nagabiya kang Cristo, dili si Cristo ang nagabiya sa mga tawo.

¹¹⁰ Ang Israel man ang mibiya sa nagadagayday nga tubig, dili ang nagadagayday nga tubig ang mibiya sa Israel. Kita n'yo? Kay, klaro nga ginaingon sa Biblia nga, "Ang Bato ug ang tubig nagsunod sa Israel." Nagsunod kanila! Bisan asa sila miadto, Kini miuban, usab.

¹¹¹ Oh, buot ko, niining buntaga, kung aduna pa kita'y oras, nga moabli sa unang kapitulo sa Josue, kon diin Siya miingon, "Bisan asa magatunob ang lalapapa sa inyong tiil, gihatag Ko kaninyo. Bisan asa ikaw paingon, ang Ginoo nga imong Dios magauban kanimo. Ayaw kahadloki ang si kinsa man nga tawo. Magmaisug ka! Bisan asa ka man motikang, Ako magauban mismo kanimo, bisan asa man kini." Ang Dios nagauban mismo kang Josue!

¹¹² Ang mao ra nga Dios nagauban sàb sa Iyang Iglesia niining buntaga. Manginom kita dinha niini nga Tuboran. Bisan asa man kamo motikang, atua ang Dios mismo magauban kaninyo, aron maghatag og tubig ug maghatag sa inyo og Kinabuhi. "Ako magauban kaninyo sa kanunay, bisan hangtud sa katapusan sa kapanahonan." Si Cristo mao sa gihapon kagahapon, karon, ug hangtud sa kahangturan. Ang mga balaod sa Dios.

¹¹³ Karon moingon mo, "Kung ingon-ana, Igsoong Branham, ngano man nga dili nato ginabuhat ang mga butang nga ngay unta natong buhaton? Nganong ang atong mga gasa ug mga

ingon-anang butang sa iglesia wala pa midangat sa hugna, kon diin kini angay'ng mapahimutang? Nganong ang among iglesia wala nagalambo ngadto sa angay unta nga makab-ot niini?" Tungod ang mga tawo, sa panahon sa pagsulay, nangbiya man sama sa Israel kaniadto. Abi man gud nila nga gibiyaaan sila sa Dios.

¹¹⁴ Apan, timan-i n'yo, wala gayud sukad biyai sa Bato ang Israel. Ang Israel ang mibiya sa Bato, nakalimtan nila nga ang Bato kauban ra diay nila sa tanang panahon. Atua ra Kini mismo didto, nga nagauban kanila hangtud sa katapusan sa panaw. "Nagsunod Kadto kanila." Wala gani Kadto mipalayo nga dili na maistorya. Wala Kadto mipalayo nga dili na madungog. O, wala Kadto mipalayo nga dili na makita.

¹¹⁵ Ug mao man usab si Cristo! Sa Iglesia sa karong panahon, dili Siya nagapalayo nga dili na maistorya. Bisan ang uban kaninyo nag-backslide na, ug nakabuhat og sayup, ug nawala na sa inyo ang kalipay, ug ang inyong Tubig nauga na. Pero anaa ra gihapon Siya nga mahimo ninyong maestorya. Nagasunod Siya kaninyo. Nasayod Siya sa matag lihok ninyo ug sa tanan-tanan nga ginabuhat ninyo. Nagapangandoy Siya nga madungog kamong nagapanawag Kaniya nga moanha sa eksena.

¹¹⁶ Ug sa niining bantugang Pentecostal nga kalihokan sa karong panahon, nagahulat lang ang Dios nga tawgon ninyo Siya sa eksena. Dili man kamo ingon ka halayo sa pagpakig-istorya Kaniya. Bisan pa nga nakabuhat kita og sayup, ug nakasala, ug mitalikod Kaniya, ug—ug gibuhat ang mga butang nga dili nato angay'ng buhaton, apan bisan pa niana Siya nagauban gihapon kanato. Miingon man si Cristo nga Siya magauban kanato.

¹¹⁷ Miingon ang Biblia, "Ang maong mga tubig nagsunod sa mga anak sa Israel." Sa diha nga pang-uhawon sila, nasayod sila nga haduol ra ang tubig.

¹¹⁸ Bueno, kining mga butanga kontrolado sa mga balaod. Ang tibuok sistema sa Dios gihan-ay pinaagi sa mga balaod. Karon ipananglitan nato . . . Mohunong sa tà sa makadiyut.

¹¹⁹ Ipananglitan na lang nato ang kalibutan. Nagatuyok kini, nga kada baynte-kuwatro oras nagahimo kini og bug-os nga pagtuyok, sa ingon ka hingpit, nga . . . Wala gani kita'y kasarang, bisan pa sa tibuok natong siyensiya, nga makahimo og relo nga perpekto gyud ang oras sa tanang panahon. Matag karon ug unya, bisan ang pinakamaayo nga mga relo nga nahimo nila, sulod sa usa ka tuig, mahimong nagakauna kini o kaha nagakaulahi og pipila ka minuto. Apan ang kalibutan wala gayud nagapalyar og ingon gayud kini ka tukma sa matag segundo. Kini'y ingon gayud ka eksakto nga ang mga siyentista karon, ang mga astronomo masulti nila kaninyo, sulod sa baynte ka tuig gikan karon o singkwenta ka tuig gikan karon, kung kanus-a labyan sa adlaw ug bulan ang usa'g usa sa ingon

ka eksakto gayud. Ngani sa pagtuyok niini sulod sa baynte-kuwatro oras nga paglibot, ug ang oras sa pagtuyok niini sa orbit niini sa usa ka panahon, dili kini nagapalyar ni usa ka segundo. Alleluyah! Eksakto gayud, tungod kay nagalihok man kini sumala sa balaod sa Dios.

¹²⁰ Hingsayran nila sa ingon ka eksakto kung kanus-a mohunas ang dagat, hangtud sa pinaka-minuto niini, tungod kay hingsayran man nila kung kanus-a mosalop ang bulan. Ug gipahiluna na sa Dios ang tanan-tanan diha sa kahan-ayan pinaagi og balaod. Ug pag mosalop ang bulan, dungan pud niini nga mohunas ang dagat. Pag mosubang ang bulan, dungan pud niini nga motaub ang dagat. Ug eskaktong nahibaloan nila, pinaagi sa pagkalkula sa oras, kung kanus-a mosalop ang bulan. Mao nga mahimo nilang imantala na daan kana diha sa almanac nga kalendaryo bisan pipila pa ka tuig adisir mahitabo, ug sultihan kamo, hangtud sa pinaka minuto, kung kanus-a magsugod hunas ang dagat. Tinuod, tungod kay sa ingon-anang paagi man nagasalop ang bulan, tungod nga nakahan-ay na kana sa balaod sa Dios.

¹²¹ Atua ako, niadtong miaging adlaw, didto sa Lake Michigan. Ug miadto pud ko didto sa Lake Superior, nga usa ka halapad nga porma sa tubig, sa pagpaingon nako sa Canada. Ug nagtindog ko didto, ug nahunahuna ko, “Pila ka milya kaha ang kalapdon niining halapad nga tubig dinhi?” Ug dayon human nga milatas ko sa Mich-. . . , o, Lake Superior, mihapit ako sa Michigan, nga halos pareho ra ka halapad nga porma sa tubig. Ug paingon didto, gikan sa Lake Superior paingon sa Lake Michigan, gikan sa Lake Michigan paingon sa Lake Ontario, ug grabe . . . ug sa Huron, ug tanan na nga mga linaw. Pila kaha ka binilyon bilyon ka pilo, ug dili-maihap nga mga barrel sa tab-ang nga tubig ang anaa niadto nga linaw!

¹²² Ug didto pud sa Nevada, ug sa Arizona, New Mexico, og Eastern California, anaa ang minilyon ka ektarya nga uga nga yuta, og nabulad sa adlaw. Matambok kaayo kana, nga kung ang tubig makaabot lang unta niana nga kayutaan, nan mahimo niining nasura nga mapakaon ang tibuok kalibutan, wala na’y mga tawo nga magutoman, ug aduna pa’y sobra nga mabalik sa dagat. Husto! Minilyon ka ektarya nga yuta nga makapatubo og minilyon ka tonelada nga mga patatas ug repolyo, ug mga batong ug—ug letsugas, ug mga rabanos ug kintsay, ug mga pipino, ug uban pa. Motubo gyud kini nianang yutaa, pero manginahanglan sa lagi kana—kana og tubig.

¹²³ Ug ania ang tubig *dinhi* dapit, ug ania pud ang maong yuta *dinhi* dapit. Karon makita nato kini, ug nasayod ta nga makapatubo gyud kini, tungod kay masusi nato ang tubig ug makita nga tab-ang kini, ug masusi pud ang yuta ug nakita nga matambok kini. Bueno, bisan sa tanang pagpangandoy nga mahimo nato, dili gyud nato mapahigayon kana. Pero, aduna

ma'y balaod, ug kana nga balaod mao ang grabitasyon. Karon, kung mamuhat kita sumala sa grabitasyon, nan mapatubigan nato ang matag bahin nianang yutaa, mokuha tà og tubig gikan sa mga linaw ug patubigan kana. Pero gikinahanglan natong mamuhat sumala sa balaod sa grabitasyon. Dili nato kana mapatubigan pinaagi sa pagpangandoy lang. Dili nato kana mapatubigan pinaagi sa pagsinggit. Dili nato kana mapatubigan pinaagi sa pagsiyagit. Kondili kinahanglan nato nga mamuhat sumala sa mga balaod sa grabitasyon, aron madala kini didto. Gipahimutang sa Dios ang tanan-tanan uyon sa balaod.

124 Aniaya, akong nadumduman, wala ko kabalo kung gisultihan ko na ba kamo niini, o wala pa. Atua ako niadto sa Kentucky, para mangayam og squirrel, kauban si Igsoong Wood, mga usa ka tuig na ang milabay. Ug kami . . . Medyo nihit man kaniadto ang mga squirrel, ug mao nga miadto sa kami sa balay sa usa ka tawo, aron manghibalo bahin sa pagpangayam. Ang maong tawo aduna ma'y pipila ka ektarya nga yuta, ug sa niini nga yuta daghan kaayo og kahoy. Pero miingon sa ako si Igsoong Wood, nga, "Kini nga tawo dili baya nagatoo sa Dios. Siya'y—usa siya ka dili-magtotoo." Mao nga nasulti niya nga kaila niya kono ang maong tawo, busa siya . . . o ang iyang amahan ang nakaila sa maong tawo, moadto kami didto ug mohangyo kung matugotan ba kami nga makapangayam.

125 Mibiyahe na mi paingon sa lugar niadtong tawo. Ug siya ug may usa pa ka tawo didto, pareho sila nga mga setentahon na, nanglingkod sila ilalum sa punoan sa mansanas. Ug miduol si Mr. Wood sa niining tawo, ug miingon siya kaniya, "Puede ba kong mangayam og diyutay sa imong lugar?" Ug mitubag ang tawo, "Bueno," ingon siya, "sige." Ingon pa siya, "Si kinsa man ka nga Wood? Anak ba ka ni Jim Wood?"

Ingon pud niya, "Oo."

126 Ingon siya, "Bueno, ang tigulang nga si Jim matinuoron baya, ug uban pa." Ingon siya, "Puede kang mangayam sa bisan asa nimo gusto, sa akong lugar. Aduna man ko'y *pipila* ka gatus ka ektarya dinhi, sige pangayam lang. Umadto ka didto sa may walog, o kon asa mo man gusto. Isipa lang nga imoha usab kini nga lugar."

127 Anaa ra ko niadto sulod sa sakyanan, tungod kay nahunahuna man nako nga maayo nga mag-uban ang usa ka magwawali ug ang usa ka dili-nagatoo sa Dios, unya mihangyo pa gyud mi og pabor sa usa ka dili-nagatoo sa Dios.

128 Ug wala magdugay, miingon si Igsoong Wood, "Bueno, karon, puede ba nga ubanon nako ang akong pastor? Okey ra man siguro nga ako siyang ubanon."

129 Ug kining tigulang nga tawo milingi nga hawid ang iyang sungkod, ug ingon niya, "Wood, buot mo bang isulti kanako nga

nagpakaubos ka og ayo, nga kinahanglan pa nimong magkuyog og usa ka magwawali sa kon asa ka moadto?"

¹³⁰ Ug busa, nahunahuna nako, human niadto, nga mas maayo kon monaug ako sa sakyanan. Busa minaug ko sa sakyanan, ug nakig-istorya niadtong tigulang nga tawo sa pipila ka minuto. Ug gipahibalo niya dayon ako nga dili gyud kono mahinungdanon ang mga magwawali para sa iyaha, tungod kay gahunahuna man siya nga nagasulti lang ang mga magwawali mahitungod sa butang nga sila mismo walay hibangkaagan.

¹³¹ Ingon siya, "Igo lang silang nagaistorya bahin sa kung unsang butang nga sila mismo wala gani og hibangkaagan. Bueno," ingon siya, "mao nga pag may tawo nga makig-istorya sa ako, gusto ko nga nahibalo gyud siya mismo sa kung unsay iyang ginasulti." Bueno, makatarunganon kana. Makatarunganon man. Ingon pa siya, "Bueno, kung makig-istorya sa ako ang usa ka tawo, dili ko gusto nga maghisgot siya og *kung unsa man*, nga ideya nga siya mismo walay hibangkaagan. Ang gusto nako nga maghisgot siya bahin sa usa ka butang nga nahibalo gyud siya sa kung unsay iyang ginasulti." Bueno, girespeto ko kadto. Girespeto ko ang ingon-niadto sa maong tigulang nga tawo.

¹³² Ug busa miingon ko, "Bueno, siyempre, ang matag usa aduna ma'y kaugalingong opinyon."

¹³³ Ug ingon siya, "May usa ka magwawali nga mianhi dinhi niini nga probinsya, pipila na ka tuig ang milabay, nga nagpahigayon og panagtigum sa may Acton." Ug ingon siya, "Kini nga magwawali, usa ka gabii, ingon nga siya'y usa ka estranyo sa probinsya, miingon siya ngadto sa usa—usa ka babaye nga nagalingkod sa mga mananambong, 'Aduna ka'y panyo sa imong bulsa. Ug ikaw si Mrs. *Ingon niini-ug-ingon niana*. Ug aduna ka'y igsoong babaye nga may sakit nga anaa sa bungtod dinhi. Ang iyang ngalan mao si *Ingon-ani-ug-ingon-ana*. Naghimalatyon na siya, tungod sa kanser sa tiyan.' Ug miingon, 'Dad-a kining panyo ug ipatong kini sa imong igsoong babaye, ug sultihi siya, "MAO KINI ANG GINAINGON SA GINOO, dili siya mamatay, kondili mabuhi gayud."'"

¹³⁴ Ingon pa ang tigulang, "Higala man namo kadtong maong babaye." Ug miingon, "Gihatud namo kadtong panyo ngadto niini nga babaye didto, o, niadtong lalaki, uh, sa tawo. . ." Una diay miingon siya, "Kining babaye, didto man mi sa akong asawa niadtong buntaga ug among, giduaw kining babaye. Ug grabe na kaayo siya! Misurender na gani sa iyaha ang mga doktor, dugay na. Grabe na kaayo siya nga gikinahanglan namong ibalhin siya gamit ang habol, og aswaton siya aron ipahimutang siya sa may ihianan, og ibalik na pud siya. Aswaton siya gamit ang habol, tungod grabe na man kaayo siya." Ingon ang tigulang, "Usa ka

gabii, didtong dapita, may kabanha nga daw sa adunay namatay sa ilaha.”

¹³⁵ Atua man didto si Ben, nga dala kadtong panyo, og gidala kadto didtoa. Sa hunahuna ko mora’g ikaw kadto, dili ba, Ben? [Nagaingon si Igsoong Ben Bryant, “Amen. Amen.”—Ed.] Si Igsoong Ben lagi nga anaa dinha, ang nagdala niadtong panyo, kay siya man ang naghatud sa babaye didto.

¹³⁶ Ug miingon, “Pagkasunod buntag, ang maong babaye nagkaon na og pinirito nga apple pie.” Ug miingon, “Dili lamang ang iya mismong trabaho ang iyang ginabuhat, kondili ginabuhat usab niya ang trabaho sa iyang silingan. Naayo na gayud siya!” Miingon siya, “Bueno pirmi kong gihunahuna. Kung makita lang nako kadto nga magwawali, nahibalo gyud siya sa kung unsay iyang ginasulti,” miingon, “mao nga ako—gusto kong maistorya siya.”

¹³⁷ Mitan-aw sa ako si Igsoong Wood, ug mitan-aw pud ko sa iyaha. Nagtindog ko didto, nga hugaw, ug gisingot ug nagkabulingit, tungod taud-taud na man ming atua didto sa kakahoyan, ug—ug nalukop kami og dugo sa squirrel. Ug busa ingon ko, “Bueno,” ingon ko, “ang. . . Buot ba nimong ipasabot nga gusto nimong maistorya kini nga tawo ug para masugilon niya sa imoha kung giunsa niya pagbuhat kadto?”

Ingon siya, “Oo, sir, mao kana’y buot kong ipasabot.”

Ingon ko, “Bueno, kana’y—maayo kana.”

¹³⁸ Nagkaon ko niadto og usa sa iyang mga mansanas. May mga gagmay’ng buyog nga nanagtugdon niadtong mga punoan sa mansanas, kabalo na mo, tinglagas na man gud kadto nga panahon sa tuig, bulan kadto sa Agosto. Bueno naghawid ko niadtong gamay’ng mansanas, nga akong gikaon. Ug ingon ko, “Pagkalami niini nga mansanas.” Ingon ko, “Unsa na ba ka dugay kana nga punoan dinha?”

¹³⁹ “Oh,” ingon siya, “Gitanum ko kana nga punoan dinha, traynta o kuwarenta na ka tuig ang milabay, o mora’g ingon niana.”

¹⁴⁰ “Diay, sir.” Ingon ko, “Aduna unta ko’y gustong ipangutana kanim.” Ingon ko, “Giunsa ba. . . Nakita nako ang mga mansanas nga nangahulog na gikan nianang punoan, ug nangadagdag na sàb ang mga dahon niana, ug ania tunga-tunga pa lang man sa Agosto.” Ug ingon ko, “Wala pa man gani ang tingtugnaw, wala pa kita’y niyebe o unsa man, ug bisan pa niana nangadagdag na ang mga dahon gikan nianang punoan. Nganong ingon niana man?”

Ingon siya, “Mibiya na man gud ang mga tagok dinha sa punoan.”

“Oh,” ingon ko, “asa man pud napaingon kana?”

Ingon siya, “Dinha sa mga gamut.”

Ug ingon ko, “Kung ingon-ana unsa pud ka dugay kining magpabilin dinha sa ubos?”

Ingon siya, “Hangtud pa sa tingpamulak.”

¹⁴¹ Ug ingon ko, “Kung ingon-ana mobalik na usab kana, ug manggitib na pud ang mga bag-ong dahon para maghatag og landong, og bag-ong mga mansanas para makaon.”

Ingon siya, “Husto kana. Husto gayud.”

¹⁴² Ingon ko, “Bueno, aduna unta ko’y gustong ipangutana kanimo, sir. Nahisgotan mo man ang bahin niining mga tawo nga wala nahibalo sa kung unsay ilang ginasulti.” Ingon ko, “Mahimo ba nimong isaysay sa ako kung unsa nga Kaalam ang nagapabalhin sa mga tagok nianang punoan? Kung magpabilin kana dinha sa tibuok tingtugnaw, nan mamatay ang punoan. Mamatay na ang punoan. Ingon nga ang binhi sa kinabuhi anaa man dinha sa tagok.” Busa ingon ko, “Mamatay na ang punoan. Unsa gyud kaha nga Kaalam ang nagapabalhin sa mga tagok dinha nianang punoan, og nagakanaug paingon sa mga gamut, ug magpabilin dinha hangtud na sa panahon sa tingpamulak, ug pagkahuman mobalik na usab ug mamunga og daghang mansanas?” Ingon ko, “Kon magbutang ka og tubig sa usa ka balde ug ibutang kana sa usa ka poste, ug tan-awa kung, sa bulan sa Agosto, mokanaug ba kana paingon sa ilalum sa poste ug mobalik na usab sa panahon sa tingpamulak. Kita mo?” Ingon ko, “Aduna gyu’y sa kung unsa nga balaod, adunay balaod sa kinaiyahan mismo. May usa ka Kaalam nga naghan-ay niini nga balaod. Dili lang kana, kondili ang mao mismo nga Kaalam mao gihapon ang magpalihok niana nga balaod, nga mao’y nagapakanaug sa tagok paingon sa gamut sa punoan, ug nagapabalik pag-usab.”

Ingon niya, “Wala gyud nako nahunahuna kana.”

¹⁴³ Ingon ko, “Mahimo ba nimo . . . Kung masayran man nimo kung unsa nga Kaalam ang nagapabalhin sa tagok gikan sa mga sanga sa punoan, og ipapanaug kini paingon sa mga gamut ug ipabalik ra usab, nan mao kadto mismo nga Kaalam ang nagsulti kanako didto niadtong gabhiona, ‘Lakaw, og ipatong kana nga panyo ngadto sa babaye.’”

Ingon siya, “Ug ikaw diay kadto nga magwawali?”

Ingon ko, “Oo, sir, husto kana.”

¹⁴⁴ Niadtong miaging tuig miadto ako (mitaliwan na diay siya), ug niadtong higayona nagalingkod sa may balkonahe ang iyang balo, nagapanit og mga mansanas, gikan niadtong mao ra nga punoan. Igsoon . . . Una papahawaon unta mi nila kaniadto, wala man gud sila kaila kung kinsa kami. Ug miduol ako ug gisuginlan siya mahitungod niadto, nga may pagtugot kami gikan sa iyang bana. Ug gisugilon ko ang mahitungod niadto, ingon siya,

“Dayag gayud niyang gipahayag ang pagdawat niya kang Cristo sa wala pa siya namatay.”

¹⁴⁵ Nakita n’yo, unsa ba ang nagpahimo niadtong punoan, unsa ba nga Kaalam ang nagapakanaug sa tagok niadto? Usa ka balaod. Usa kini ka balaod nga gihan-ay sa Dios. Ug kana nga balaod mao ang balaod sa Dios nga magaatiman sa mga ginsakupan Niya. Amen.

¹⁴⁶ Abi ninyo, dili ko igsapayan kung unsa man ka kusog ang inyong pagsinggit, ug moingon—moingon karon, “Dili mahitabo, dili na mosidlak ang adlaw niining umaabot nga ting-init.” Mosidlak gyud kana, sa gihapon. Bisan unsaon pa ninyo sa pag-ingon, “Ako—ako—dili ko tugotan nga moabot ang kagabhion.” Moabot gyud kana, sa gihapon. Tungod kay kining butang nga atong gikinabuhian, nga gitawag og kalibutan, kontrolado man kini sa balaod sa Dios.

¹⁴⁷ Karon, mga igsoong lalaki ug mga igsoong babaye, aduna ko’y ihangyo sa inyo. Dayon, kung kita’y natawo na pag-usab sa Espiritu sa Dios. . . ang Dios wala ma’y gagmay’ng mahuyang nga mga bahin ug dagkung malig-on nga mga bahin, Siya’y bug-os gayud nga Dios! Ug kung aduna kamo’y igong Dios diha kaninyo, nga bisan Kini’y halos anino na lang, nan igo na kana nga gahum aron maglalang og bag-ong kalibutan. Igo na kana nga gahum aron maglalang og bag-ong bulan ug bag-ong mga planeta. Tungod ang Dios man kana, ug gamhanan kana! Ug karon mismo ang matag magtotoo nga ania dinhi aduna na’y Kinabuhing Walay Katapusan, nga mao, ang Espiritu sa Dios nga anaa kaninyo; igo gayud nga Gahum nga magabanhaw sa mga patay, nga magaayo sa mga may sakit, nga magahan-ay sa mga orbit sa husto nga kahimtang. Pero kamo, kontrolado kana sa balaod, kanang Espiritu nga anaa kaninyo. Kamo’y mga anak nga lalaki ug mga anak nga babaye sa Dios. Kanang mao ra nga Espiritu nga anaa kaninyo, ang magabanhaw kaninyo nianang adlaw sa pagkabanhaw.

¹⁴⁸ Si Jesus, kaniadtong ania pa Siya sa yuta, sa pagkamatay Niya, ang Iyang kalag mikanaug ngadto sa impiyerno, “Ug nagwali sa mga espiritu nga atua sa bilanggoan, sa mga kalag nga atua sa bilanggoan, nga wala naghinulsol niadtong pagkamapailubong mga adlaw ni Noe.” Ang Iyang lawas mipaingon sa lubnganan. Pero sa wala pa Siya namatay, gitugyan Niya ang Iyang Espiritu ngadto sa mga kamot sa Dios. Mao nga ang Iyang Espiritu mipaingon sa Dios, ang Iyang kalag mipaingon sa impiyerno, ug ang Iyang lawas atua sa lubnganan. Ug nababagan si Jesus nga mabanhaw hangtud nga matuman úna ang Kasulatan. Dili man Siya mahimong mabanhaw dayon, tungod kinahanglan man Niyang magpabilin sa lubnganan sulod sa tulo ka adlaw ug gabii. Apan sa diha nga bug-os nang natuman ang Kasulatan, gitangtang na kining babag; ang Iyang

Espiritu mikunsad sa Iyang kalag, ang Iyang kalag sa Iyang lawas, ug nabanhaw na Siya.

¹⁴⁹ Ug pag mamatay kita, ang atong mga kalag mopaingon na sa ilalum sa halaran sa Dios; kon diin nagkaaduna ako og pribilihiyo nga makita, pipila pa lang ka buntag ang milabay, sumala sa inyo nang nahibaloan, sa panan-awon, diin ginaingon sa Biblia nga, “Ang atong mga espiritu mopaingon ngadto sa Dios Nga naghatag niini, ug ang atong mga lawas mobalik sa abog sa yuta.” Apan sa umaabot nga adlaw, pag ang Kasulatan matuman na, ipagawas ang atong mga espiritu gikan sa Dios, kuhaon ang kalag, ug ang kalag mopaingon sa lawas. Ug ang Gahum nga magabanhaw kanato, ania na mismo sa kinasuloran nato karon! Anaa na kita karon sa mga Langitnong dapit. Anaa na kita karon sa Gahum sa pagkabanhaw.

¹⁵⁰ Kung walay balaod para niana, nan ang mga anak nga lalaki ug mga anak nga babaye sa Dios ang maoy maglalang para kanila og usa ka kalibutan dinhi ug magkinabuhi og usa ka pribado nga kinabuhi dinha. Aduna ma’y Gahum diha kaninyo para buhaton kana. Kung aduna man diha kaninyo og bisan anino ra sa Gahum sa Dios, nan aduna kamo’y Gahum para buhaton kana. Pero ang Dios gayud ang makagagahum-satanan. Nasabtan n’yo ba ang buot kong ipasabot? Ang Gahum nga anaa kaninyo ang magahimo, mahimo ninyong molitok og kalibutan aron motungha ug puy-an kini. Alleluyah! Mao kana.

¹⁵¹ Ingon niana ang Gahum nga anaa sa Iglesia karon, pero kontrolado kini sa usa ka balaod. Ug kini nga balaod dili ang “pagtuman og pipila ka mga sugo.” Kondili kini mao’y balaod sa pagtoo. Miingon si Jesus, “Ang tanang butang mamahimo kanila nga nagatoo.” Ug kung mahimo n’yong toohan kini, unsa man ang pagapangunahan sa Dios nga para toohan sa inyong kalag, inyoha kana. Ang matag dapit nga pagatumban sa lalapala sa inyong tiil, pinaagi sa pagtoo, gihatag kana sa Dios para kaninyo. Amen! Inyoha kana, panag-ya n’yo kana, kung makaplagn lang ninyo ang yawi niining balaod sa pagtoo nga mao’y magaabli niana para kaninyo. Nasabtan ba ninyo ang buot kong ipasabot? Kana nga Gahum kontrolado sa . . . Kung usa kamo ka anak nga lalaki sa Dios, o usa kamo ka anak nga babaye sa Dios, dili na kana mawala sa inyo. Anaa na kana kaninyo sa tanang panahon. Kon, mapahilayo man ang inyong pagtoo gikan Niini, anaa Kini dinha sa gihapon. Alleluyah!

¹⁵² Sa dihang naluwas kamo, naghatag ang Dios sa inyo og pagtoo aron makahaw-as mo gikan sa lapok sa kalibutan. Pagadaugon sa inyong pagtoo ang mga butang nga iya sa kalibutan. Unsa man ang inyong pagtoo? Ang inyo kining pagtoo sa buhat nga gibuhad na sa Dios diha kaninyo, aron mahimo kamo nga anak sa Dios. Giundangan n’yo na ang inyong pagpamakak, giundangan n’yo na ang inyong pagpangawat, giundangan n’yo na ang inyong paghuboghubog, tungod kay

ginapataas man kamo sa inyong pagtoo paibabaw niini. Amen. Kung dili n'yo kana ginabuhat, nan wala kamo'y unsa man nga pagtoo. "Ug pinaagi sa pagtoo kamo naluwas, ug kana pinaagi sa grasya."

153 Kung unsa ka daku ang pagtoo nga inyong ipagawas, ingon-ana pud ka daku ang Gahum nga anaa kaninyo, tungod kay diha kaninyo nagapuyo ang Gahum nga mao'y magbuhat sa mga Langit ug yuta. Ang Dios nagapuyo diha kaninyo, ug kamo'y mga anak nga lalaki ug mga anak nga babaye sa Dios. Amen! Mao kana. Pero, tungod kana sa inyong pagtoo. Ang ingon ni Jesus, "Sumala sa imong pagtoo, matuman kana kanimo. Kung mahimo mong toohan, ang tanang butang mamahimo. Sa pagkatinuod, magaingon Ako kaninyo, kung magaingon ka niining bukid, 'Bumalhin ka,' ug dili magduhaduha sa imong kasingkasing, kondili toohan gayud kanang unsa ma'y imong giingon!"

154 Kung ingon-ana unsa nga matang sa mga tawo kita angay'ng mamahimo, ingon nga adunay pagtoo niining gamhanang nagatubos nga Cristo nga nagapuyo sa sulod nato, kining gibunalan nga Bato nga wala gayud nagabiya sa Iglesia? "Ako magauban kaninyo sa kanunay, bisan hangtud sa katapusan sa kalibutan," ang kanunay'ng-Presensiya sa makusog nga bulog sa kaluwasan ug Gahum nga gibubo gikan sa Kalbaryo paingon sa Iglesia, ang kanunay'ng-Presensiya sa buhi nga Dios, ang mahimayaong agas, ang gibunalan nga Bato nga nagauban kanato sa atong pagpanaw.

155 Nawala sa Israel ang iyang pagtoo. Mitipas sila sa dalanon. Hinay-hinay sila nga nangibog sa mga kolon nga unodnon. Pero kung nagpabilin lang unta sila sa pagtoo, ug nagtoo nga pagadalhon gyud sila sa Dios paingon sa yutang saad, nan wala gyu'y unsa mang butang nga makababag kanila. Napabuka na gani nila ang kadagatan, gibunalan nila pinaagi'g mga hampak ang ilang mga kaaway, gilansang nila ang ilang mga kaaway nga nanaggukod kanila, ug nakatabok na mismo paingon sa maong yuta, ug bisan pa niana wala sa gihapon og pagtoo nga magpadayon paingon sa saad.

156 Pero si Josue ug si Caleb aduna gyud og pagtoo! Miingon sila, "Kita labaw pang makahimo sa pagdaug sa unsa mang butang nga moabot sa atong atubangan."

157 Mao kana ang problema sa iglesia. Mahimo man unta natong daugon ang matag balatian. Tungod ania man kanato ang Gahum. Kita'y mga anak nga lalaki ug mga anak nga babaye sa Dios, og walay unsa man nga makababag kanato. Ang usa ka butang lang, ginatinguha Niya nga makakaplag og tawo nga motoo niini, nga motoo nga ang Dios namuhat na alang kaninyo. Dili nga *mamahimo pa lang* natong angkonon; kondili naangkon

na nato karon mismo! Ug ang kanunay'ng-buhi nga Presensiya sa Espiritu ania man uban kanato. Amen! Mao kana.

¹⁵⁸ Mao kini ang buot kong ipasabot sa paghisgot ko niini nga hilisgotanan karong buntaga, *Ang Tubig Nga Kanunay'ng-Anaa Gikan Sa Bato*. Ang kanunay'ng-anaa nga Tubig gikan sa Bato ania mismo karon, ang kanunay'ng-anaa nga Tubig gikan sa gibunalan nga Bato didto sa Kalbaryo. Sa dihang migawas ang Espiritu Santo gikan Kaniya didto sa Kalbaryo, nga miadto sa Iglesia niadtong Adlaw sa Pentecostes, ang mao ra nga Espiritu Santo ania mismo karong buntaga. Ug naghatag Kini og saad kanato!

¹⁵⁹ Mao kana'y hinungdan, nga sa dihang nagaduol ko sa atubangan sa mga may sakit, sukad niadtong gisugo Niya ako didto, gitooan ko kini; mao ma'y giingon sa Dios! Sa ingon-anang paagi nagakahitabo ang mga panan-awon; gisaad na kini sa Dios! Dili Siya mahimong mamakak.

¹⁶⁰ Toohi n'yo kini! Kinahanglan n'yong toohan kini. Kinahanglan aduna gayu'y Butang dinha, nga moabli nianang babag, nga moabli nianang butang aron makasulod kamo dinha. Ang gikinahanglan nato sa karon dili ang mag-ampo para sa dugang pa nga Gahum. Aduna na kamo'y igong Gahum para maglalang og bag-ong kalibutan. Ang gikinahanglan ninyo mao ang pagtoo aron magamit kana nga Gahum. Ang gikinahanglan ninyo mao ang kontrolon kana nga kinabuhi, ug magkinabuhi og diosnon nga pagkinabuhi, aron kon mangayo kamo sa Dios og unsa mang butang, nasayod na kamo! Hinoon aduna man kita'y pagsalig sa Dios, bahin niana. Nasayod tà, nga kung tumanon nato ang Iyang mga Sugo, nan dili Niya idumili kanato ang unsa mang maayong butang, kung maglakaw kita uban Kaniya. Ang Dios magalakaw uban kanato. Oh, pagkanindot!

¹⁶¹ May usa lang ka butang ang angay nilang buhaton kaniadto. May usa lang ka butang ang angay nilang buhaton, kana ang, magpadayon nga diritso lang sa maong dalanon. Dili nga motipas *dinhi*, ug motipas *didto*; kondili magpabilin ra mismo sa dalanon! Ang Iglesia usab adunay usa lang ka butang nga angay'ng buhaton, ang magpabilin mismo sa dalanon! Aduna sila kaniadto og Haligi nga Kalayo, nga anaa mismo kanila, aron mapapabilin ang ilang mga kaugalingon diha sa dalanon pinaagi sa pagsunod niadtong Haligi nga Kalayo. Mao kadto ang nanguna kanila. Ang butang nga makita nila, mao kadtong Haligi nga Kalayo. Nakita nila Kadto nga namuhat pinaagi kang Moises, ug nasayod sila nga siya mao ang lider.

¹⁶² Sa karong panahon anaa kanato ang Pulong. Nagasunod kita sa Pulong. Ug makita nato ang Pulong nga nagapamuhat sa mga magtotoo, ug nasayod tà nga mao kini, mismo. Nagapamuhat kanato ang Dios, nga ginapanghimatud-an ang Pulong pinaagi

sa mga ilhanan nga naganunot! Nagapabilin kita sa Pulong. Ang Pulong nagapamunga pud og mga bunga.

¹⁶³ Nagpabilin man sila kauban ni Moises. Tungod kay, ang Haligi nga Kalayo, ginasundan man Kadto ni Moises. Ug nanagsunod sila. Pero sa dihang hinay-hinay na sila nga mitalikod kang Moises, ug nagbagutbot batok sa Dios ug batok kang Moises, nangtipas sila ngadto sa usa ka bahin ug sa pikas bahin. Nangabot na dayon ang mga kalisdanan. Tinuod.

¹⁶⁴ Magpabilin kita sa Pulong, tungod ang Pulong nagapakita man og mga ilhanan. Miingon si Jesus, “Kini nga mga ilhanan maganunot kanila nga nagatoo sa Pulong.” Kita n’yo, kini nagapabilin sa . . . Magpabilin kamo sa Pulong, ingon nga ang Pulong nagapakita man mismo og mga ilhanan. Pero, si Moises, unsa ma’y gibuhath niya?

¹⁶⁵ Nangtipas ang mga tawo, ug unsa ma’y gibuhath nila? Mitipas sa dalanon, ug nawad-an hinoon sila og kapanguhaan og tubig.

¹⁶⁶ Sa hunahuna ko ingon niana pud ang gibuhath sa iglesia karong panahona. Nahisimang kini gikan sa dalanon sa Kasulatan. Misimang sila ngadto sa mga ismo. Misimang sila ngadto sa mga gagmay’ng butang nga dili nila unta angay’ng buhaton. Nanagdawat sila og mga butang. Nanagdawat sila og mga butang nga sama sa Kredo sa mga Apostoles. Asa ba ninyo makaplagan kana diha sa Biblia? Giaplikar nila ang mga katekismo nga ilang nabasa. Gipili nilang sundon ang mga denominasyon imbis nga ang usa ka kasinatian. Gipili nilang iaplikar ang pagpakiglamano imbis nga ang kasinatian sa pagkahimugso pag-usab. Gipili nilang iaplikar ang pagwisik-wisik imbis nga ang bautismo sa tubig mismo. Giaplikar nila ang usa ka dautan nga paagi, “Amahan, Anak, ug Espiritu Santo,” nga wala man gayu’y ingon-anang butang sa Biblia. Ang ingon sa Biblia, “Sa Ngalan ni Jesus Cristo!” Usa ka butang lang ang angay n’yong buhaton kung nagtinguha kamo nianang mao ra nga Tubig, pamalik na mo sa dalanon pag-usab. Pamalik na mo sa . . . Wala baya Siya mibiya; ania Siya sa gihapon. Mga kredo man gud ang inyong gidawat imbis nga si Cristo. Mao nga sa kung asa na lang kamo nangahisalaag.

¹⁶⁷ May usa nga miingon, “Bueno, usa ako ka Methodist.”

Miingon pud ang usa pa, “Usa ako ka Baptist.”

Nagapakita lang kana nga dili kamo usa ka Cristohanon, kung ingon-ana. Iya kita ni Cristo! Panag-iya Niya kita.

Moingon ka, “Bueno, kung, ako, usa ra diay ka Baptist?”

Kung ingon-ana ka lang, nan dili ka iya ni Cristo, usa ra ka ka Baptist.

Moingon ka, “Bueno, Pentecostal ako.”

Kung Pentecostal ka lang pinaagi’g denominasyon, nan ingon-ana lang gyud ka.

168 Gawas lang, kung aduna ka'y pentecostal nga kasinatian! Ug ang pentecostal nga Pulong magapamunga man og pentecostal nga kasinatian! Sundon n'yo ang mao ra usab nga butang nga gibuhat sa mga tinun-an kaniadto, magpabilin kamo dinha hangtud nga mapuno kamo sa Espiritu Santo.

169 Ug kung mahitabo man nga nagasupak na kamo sa Pulong, kon kanang espiritu nga anaa kaninyo nagasupak na sa kung unsay ginaingon sa Pulong, kung ingon-ana dili kana ang Balaang Espiritu. Ang yawa kana nga nagasundog-sundog lang sa Balaang Espiritu. Nakita n'yo kung asa na kita napaingon? Oh, ang uban kanato nagasulti og laing mga pinulongan, aduna kita'y mga panagsinggit ug mga butang nga ingon niana, pero gipanghimakak ang tanan na niining uban pang mga butang. Gitugotan na nato ang tanang butang nga wala sa Kasulatan nga makasulod sa iglesia. Asa na ba kita nahidangat karon? Nahibalik kita sa usa na usab ka disyerto, uga nga organisasyon. Nanag-organisa kita, ug nawala ang atong Tubig. Ingon-niana mismo ang gibuhat sa Pentecostal. Sa dihang misugod kining mag-organisa, misugod na pud nga naguba ang pagpakigkauban, ug moingon, "Bueno, karon dili kami magpakigkauban, kung kini nga tawo nagatoo sa *ingon niana*."

170 Ipadayon lang, ubani siya hangtud nga modangat siya sa Pulong sa Kamatuoran, sa kahibalo sa Kamatuoran. Unsa pa man kana, pasagdi ra kana, bisan pa man. Basta padayon lang mo, nga mag-inigsoonay.

171 Apan, oh, tungod lagi nag-organisa man tà, ug nagaingon, "Bueno, dili man gud mo Oneness, dili man gud mo Twoness, o Threeness, o ingon *niini*, mao nga ayaw namong magpakig-fellowship sa inyo." Kung buhaton nato kana, unsa ma'y ginabuhat nato? Ginapahibalik nato ang atong kaugalingon ngadto sa disyerto pag-usab. Husto!

172 Apan, hinumdumi n'yo, sa dihang mitipas og dalan ang Israel kaniadto, sa dalan paingon sa yutang saad, wala mibiya kanila ang Bato; nagpabilin Kini didto mismo, mao usab ang tubig. Mao usab ang Balaang Espiritu, nga nagapabilin ra dinha mismo. Mao nga dili nato kinahanglan mamalik.

173 Karon, dinhi ginatudlo kanato sa Dios ang usa ka mahinungdanong butang. Ginatudlo kanato sa Dios ang usa ka leksyon dinhi. Gibunalan na si Cristo sa makausa kaniadto, nga naghatag kanato og pentecostal nga kasinatian, usa ka higayon, para sa tanan. Ania, kaniadtong gibunalan ang Bato, dili na Kadto kinahanglan bunalan pa pag-usab. Usa lamang ka higayon nga gibunalan Kadto.

174 Pero si Moises nakabuhat og sayup tungod sa pagbunal Niadto sa ikaduhang higayon, nga nagapakita lang sa kahuyang sa iyang pagtoo ngadto sa maong Pangbayad-sa-sala. Tungod nga kaniadtong gibunalan si Cristo sa makausa, nasayod kita

nga dili na Siya kinahanglan bunalan pag-usab. Bueno, unsa ma'y gibuhat ni Moises? Adunay si Moises ginasugdan nga bag-ong butang, misulay siyang maghimo og bag-ong butang.

¹⁷⁵ Ug ingon niana usab ang gibuhat sa atong mga ministro karong panahona. Misulay silang maghimo og bag-ong butang. “Bueno, himoon natong Assemblies of God ang atong kaugalingon. Himoon natong Pentecostal Church of God ang atong kaugalingon. Himoon natong General Council ang atong kaugalingon. Himoon nato ang atong mga kaugalingon nga *ingon niini, ingon niana, o uban pa.*” Dili gyud ingon-ana ang gibuhat sa Dios. Dili Niya ideya kana.

¹⁷⁶ Gibunalan si Cristo sa makausa. Mao kadto ang orihinal nga kasinatian. Mao kadto ang orihinal nga pamaagi. Niadtong Adlaw sa Pentecostes, miingon si Pedro, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo.”

¹⁷⁷ “Nagawisik-wisik kami sa ngalan sa ‘Amahan, Anak, Espiritu Santo,’ og nagatudlo og tanan nang matang sa mga kredo ug tanan nang uban pa mahitungod Niini.” Pag mobiya gani kita sa Pulong, dili na ikatingala nga wala gyud kita’y mapaingan. Kita n’yo?

¹⁷⁸ Nagatudlo kanato og leksyon ang Dios. Dili puede moingon si Moises, “Ania magsugod kita og usa ka bag-ong butang dinhi karon, ug mag-organisa kita ug magtukod kita og iglesiang Katoliko.” Kana ang unang butang nga gibuhat nila. Dili unta, tungod wala magdugay, “Buweno, magsugod na pud ta og bag-ong butang gikan niana, magtukod kita og Lutheran.” Dayon miabot ang Anglican, ug pagkahuman ang Baptist, ug uban pa, ug ang mga Campbellite, ug ang Church of Christ, ug ang anticristo, ug tanan nang uban pa. Kita n’yo, nagsugod silang tanan nga manungha, ang usa pagkahuman sa usa pa, mitungha ang usa pagkahuman ang usa na pud, nanagtukod og mga denominasyon ug mga organisasyon. Dili man unta angay’ng ingon niana. Nakita n’yo na kung unsay pipangbuhat nila? Ginabunalan nila pag-usab ang Bato, aron magsugod na pud og butang nga bag-o. Wala kita nagkinahanglan og usa ka bag-ong doktrina.

¹⁷⁹ Ang matag tawo sa Biblia nabautismohan man sa Ngalan ni Jesus Cristo. Ang matag tawo sa Biblia nga nakadawat sa Espiritu Santo, misunod sa pamaagi sa Dios, eksakto mismo sa kung unsa ang gibuhat sa Dios. Mao ra mismo ang gibuhat nila. Mao ra nga kasinatian ang nasinati nila. Mao ra nga mga ilhanan ang minunot kanila. Mao ra usab nga mga buhat ang minunot kanila. Ngano man? Tungod nagkinabuhi man sila pinaagi sa Bato. Mao ra mismo nga Tubig ang nadawat nila.

¹⁸⁰ Ug, karong panahona, ang hinungdan nga daghan kaayo ta og mga kredo ug mga denominasyon, tungod kay sige man

kitang gasugod og kung unsa na lang nga bag-o. Wala kita magkinahanglan og unsa man nga bag-ong butang. Mamalik lang tà!

¹⁸¹ Dili man unta kinahanglan bunalan pag-usab ni Moises ang Bato, og magsugod og butang nga bag-o. Ang angay niyang gibuhat unta mao ang magsulti ngadto kanila, mahitungod sa orihinal nga Bato. Oh, nagalaum ako nga nasabtan n'yo unta kana! Ang angay'ng gibuhat ni Moises mao ang magsulti sa orihinal, nga gibunalan nga Bato; dili nga misulay sa pagbunalan Niini pag-usab, dili nga misulay nga magsugod og bag-ong butang, kondili magsulti lang unta ngadto sa karaang Butang!

¹⁸² Dios, tabangan Mo unta ako! Kung mamatay man ako nga usa ka kabus, sa pulpito, ipamulong ko gihapon ang mahitungod sa orihinal nga Bato! Ipamulong ko ang mahitungod sa orihinal nga kasinatian. Ipamulong ko gayud ang mahitungod sa orihinal nga mga Kasulatan nga naghatag kanila og bautismo sa Espiritu Santo, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo.” Ania gihapon uban kanato ang kanunay'ng-Presensiya sa nagadagayday nga mga Tubig gikan sa Bato. Mao gihapon ang ipaagay Niini. Magapaagay Kini og mga panan-awon. Magapaagay Kini og mga pagpang-ayo. Magapaagay Kini og mga propesiya. Magapaagay Kini og tanan nang butang nga gipamuhat nila kaniadto.

¹⁸³ Kaniadtong misubay na ang Israel pag-usab sa mga Kasulatan, ug misubay na pag-usab sa maong dalanon, nan nakapadayon sila paingon sa yutang saad. Pero naabtan pa lagi sila og kuwarenta ka tuig.

¹⁸⁴ Ang Pentecostal pud mga kuwarenta o singkwenta ka tuig na, nga nagalatagaw sa kamingawan. Pamalik na intawon mo sa Bato! Makita ra man unta kini. Ania kini, nahisulat dinhi mismo sa Pulong. Ania ang Balaang Espiritu nga nagapamuhat sa mao gihapong mga butang nga kanunay Niyang gipamuhat sa una pa, busa ania usab ang kanunay'ng-Presensiya sa Tubig. Pamalik lang mo Niini, pamalik mo sa kaniadto, sa orihinal mismo. Unsa ba ang paagi sa orihinal?

¹⁸⁵ “Bueno, nagpakiglamano ba sila sa magwawali”? Walay ingon niana. “Gibautismohan ba sila sa ngalan sa ‘Amahan, Anak, Espiritu Santo’”? Wala gayu'y ingon niana. Wala gyu'y mga tawo sa Biblia, sa bisan asa, o bisan pagkahuman sa, tulo ka gatus ka tuig sa Biblia, ang gikabautismohan sa ngalan sa “Amahan, Anak, Espiritu Santo.” Usa kana ka kredo sa Katoliko, dili nga usa ka doktrina sa Biblia. Kita n'yo?

¹⁸⁶ Anaa kanila kaniadto ang Balaang Espiritu. Kini nga mga ilhanan minunot kanila nga nanagtoo. Mao usab gihapon ang

mahitabo karon. Kini nga Bato kanunay gayu'ng buhi sama sa kung unsa Kini kaniadto, kining gibunalan nga Bato!

¹⁸⁷ Dili kita moingon, “Bueno, karon pag-anhi mo ug magpamiyembro sa among iglesiang Pentecostal, og pag-apil sa among pang-Pentecostal nga mga kapunongan.” “Dili, pag-anhi mo ug magpamiyembro mo sa Baptist, o sa Methodist, o kaha sa Presbyterian, o sa Katoliko.” Unsa man kana? Kana mao’y pagbunal sa Bato pag-usab, gapaninguhang magsugod og butang nga bag-o.

¹⁸⁸ Sultihi sila ninyo, “Maghinulsol kamo, ug magpabautismo sa Ngalan ni Jesus Cristo,” alang sa kapasayloan sa ilang mga sala, “ug kini nga mga ilhanan maganunot kanila nga nagatoo.” Karon nagabalik na kamo sa dalanon, pabalik sa mao ra nga Tubig. Magahatag kanang mao ra nga Tubig og mao ra nga pangpadasig. Magahatag kana og mao ra nga pagkastigo sa lawas. Magahatag kana og mao gihapong gahum nga nagalimpyo. Magahatag sàb kana og mao gihapong gahum nga nagapang-ayo. Buhaton niini ang mao rang butang nga gibuhat Niini kaniadto, kung mamalik lamang kita sa mao ra mismo nga Espiritu.

¹⁸⁹ Ngani ang kinabuhi nga anaa sa punoan sa ubas magapamunga man og mga ubas. Kung namunga kini sa miaging tuig, nan mao gihapon ang ipamunga niini sa niini nga tuig. Mao kana’y balaod sa Dios. Ingon niana ang balaod sa Dios, kung usa kini ka punoan sa ubas, nan pasagdi lang, magapamunga gyud kini og mga ubas. Mahimong magsumbak ka niana og lahi nga klase sa tanum, pero pasagdi lang ug mamunga gyud kana pag-usab og mao gihapon nga mga ubas.

¹⁹⁰ Bueno nagsumbak pud baya tà sa iglesia og ismo sa Pentecostal, ismo sa Baptist, ismo sa Methodist, ismo sa Presbyterian, og—og ismo sa Anglican, ug tanan nang uban pa nga matang sa ismo. Nganong dili man ninyo pasagdan kana? Pamalik mo sa mismong Punoan, og magabalik sàb kana sa mao ra nga Gahum. Amen! Amen! Gusto ko kana.

¹⁹¹ “Magsugod og bag-ong butang.” Mao ra usab ang atong gibuhat. Dili nga paninguhaon pang ipasundayag ang atong awtoridad. “Si Doktor *Ingon niini-ug-ingon niana* mao ang nagtukod sa bantugan nga *Ingon niini-ug-ingon niana* nga iglesia sa *ingon niini-ug-ingon niana-ug-ingon niini*.” Dili unta ingon niana.

¹⁹² Ingon niana pud ang gisulti ni Moises, “Ipakita ko kanila kung unsa ang mahimo kong buhaton. Ipaagay ko kini, sa gihapon!” Gibunalan niya Kadto, pero wala kadto miagay. Misinggit siya pag-usab, “Ipakita ko kung unsay mahimo ko!” Gibadlong siya sa Dios tungod niadto.

¹⁹³ Ayaw gyud mo paghunahuna, nga kung kamo “makapanghawid lang sa kung unsa nga denominasyon.”

Papanubagon kamo sa Dios tungod niana. Eksakto gyud kana. Kinahanglan n'yong mobalik sa orihinal. Pamalik mo.

¹⁹⁴ Magpakigsulti lang kamo sa mga tawo. (Pero ayaw n'yo sila sultih, "Umanhi kamo'g magpamiyembro sa among iglesia. Tambong mo ug isaulo ang among kredo.") "Pamalik kamo ug maghinulsol, ug magpabautismo sa Ngalan ni Jesus Cristo, alang sa kapasayloan sa inyong mga sala; ug madawat ninyo ang gasa nga Espiritu Santo, kung husto ang inyong kasingkasing. Ug kini nga mga ilhanan maganunot sa mga magtotoo. Sa usa ka pundok sa mga magtotoo, kini nga mga ilhanan maganunot kanila." Tungod ngano man? Ang Bato, ang gibunalan nga Bato ug ang Iyang mga Tubig sa Kinabuhi nagaagay mismo, og ginapamunga ang mao gihapong butang nga Iyang gibuhat kaniadto. Dili gayud kana mapugngan. Oh, bitaw.

¹⁹⁵ Pero gusto man gud natong magpasundayag, ug moingon, "Kami'y Methodist, ug Baptist."

¹⁹⁶ Magsulti lang ngadto sa Bato, ingon nga anaa kanunay ang Iyang Presensiya. Ayaw n'yo tinguhaa nga magpamiyembro Niini. Akong nasulat dinhi "hiusa" diay. Ayaw n'yo tinguhaa nga magpamiyembro Niini. Dili man ninyo mahimong magpamiyembro Niini, mao kana'y tinuod. Mahimo n'yo nga magpamiyembro sa Methodist, mahimo n'yo nga magpamiyembro sa Baptist, mahimo n'yo nga magpamiyembro sa mga Pentecostal, mahimo n'yo nga magpamiyembro sa mga Anglican, apan dili n'yo gayud mahimong magpamiyembro Niini. Dili. Gikinahanglan ninyong mapuno Niini. Dili nga magpamiyembro Niini; magpapuno lang kamo Niini. Kana lang. Ingon nga puno Kini sa unsa man? Puno sa Gahum, puno sa Espiritu, puno sa Kinabuhi, puno sa kalipay, pakigdait, pagkamapuanguon, pagkamalulot, pagkamaayo, og Gahum sa Balaang Espiritu diha sa inyong kinabuhi, kay ang walay katapusan nga Presensiya anaa man dinha. Timan-i.

Kinahanglan ko nang tapuson tungod kay nagka-udto na.

¹⁹⁷ Apan, timan-i n'yo, nga wala gayud mibiya kanila ang Bato. Wala sukad mibiya kanila ang Bato. Ug dili gayud kita pagabiyaan ni Cristo; ang ingon ni Cristo, "Ako magauban kaninyo sa kanunay, bisan hangtud sa katapusan sa kalibutan." Husto ba? Ug nagpabilin ra kadtong Bato uban kanila gikan sa Horeb hangtud sa Nebo. Mao gyud. Hangtud sa Jordan, atua gihapon Kini didto. Oh Dios, gitinguha ko nga makita Kini didto sa Jordan!

¹⁹⁸ Si Moises, kaniadtong atua siya sa Jordan, kauban niya kadtong Bato sa tanang panahon. Ug nagatindog siya didto sa ibabaw, nagadungaw sa usa—usa ka pundok sa mga tawo nga nag-backslide ug mipalayo na sa Dios. Pero nangandoy gyud ang iyang kasingkasing para kanila. Ug milantaw siya sa Jordan. Atua man siya sa Jordan. Pero ang Jordan, nga espirituwal, ang

ginapasabot ko. Ug atua siya nagatindog didto, nagasingabot na ang kamatayon sa iyaha. Pero mitan-aw siya, atua sa may kiliran niya ang maong Bato. Mitunob lang siya ibabaw mismo sa Bato, ug miabot ang mga Manulonda, og gikuha siya.

¹⁹⁹ “Dili Ko gayud kamo pagabiyaan ni talikdan man.” Bisan unsa man kalisud ang mga panahon, bisan nagakatigulang na kita, unsa man nga klase sa kamatayon ang atong ikamatay, hinumdumi n’yo, nga ang Bato atua gayud didto sa Jordan. Dili Kini magabiya o dili gayud motalikod man. Hinumdumi lang ninyo kana. Ang kanunay’ng-Presensiya sa Tubig gikan sa Bato magauban gyud kanato hangtud sa katapusan sa kinabuhi, ug bisan didto sa Jordan.

²⁰⁰ Iduko nato ang atong mga ulo. [Nagahatag og pahamatngon ang usa ka igsoong lalaki—Ed.]

²⁰¹ Samtang nagalihok ang Espiritu sa taliwala nato, samtang nagalihok ang Espiritu sa Dios sa taliwala nato, aduna ba dinhi karong buntaga ang wala pa nakaila kang Cristo, ug kamo’y—dili pa kamo haduol sa Bato, wala gani mo nagapakig-istorya Niini karong buntaga? Pero kabalo mo nga Kini ania mismo karon. Makita n’yo Kini nga nagapamuhat tibuok niining dapit, makita Siya nga nagapamuhat sa palibot, og makita n’yo Kini nga nagapamuhat sa mga tawo. Kana mao ang kanunay’ng-Presensiya sa Tubig. Kana ang kaluwasan. Mao kana ang Espiritu nga nagapaawas sa ilang mga copa hangtud sa punto nga dili na sila mahimong magpakahilum, adunay butang nga kinahanglan mahitabo. Ug kon wala pa kamo makaila Kaniya, mahimo ba ninyong ipataas ang inyong kamot ug moingon, “Tampo ako, Igsoong Branham. Gusto ko karon nga maila Siya. Ug gusto kong magpakig-istorya Kaniya, ug gusto kong maila Siya ingon nga kahupnganan sa Iyang Espiritu. Gusto kong masayran nga ania Siya mismo tupad nako, sa tanang panahon. Nagatoo ko nga Siya tupad lang nako. Mao nga gitinguha kong ma-istorya Siya. Ug nagakauhaw ako, ug nagatinguha sa Dios. Gusto ko nga mas maila pa Siya”?

²⁰² Panalanginan ka sa Dios, sir. Ug panalanginan pud ka sa Dios, sir. Ug ikaw, igsoon. Ikaw, oo, dinha sa luyo. Dinhi dapit, gining, oo. Oo, gining. Nakita namo ang imong mga kamot, ug nakita pud sa Dios ang mga niini. Panalanginan ka sa Dios, batan-ong lalaki. Panalanginan ka sa Dios. Ug ikaw, gining. Amen. Panalanginan ka sa Dios. Panalanginan ka, igsoong babaye. Aduna pa ba’y lain karon, sa niining mahilumon nga gutlo. Panalanginan ka sa Dios, batan-ong lalaki, dinha sa luyo.

²⁰³ Palandunga n’yo. Palandunga n’yo, ang kanunay’ng-Presensiya sa Tubig gikan sa Bato, ang mao ra nga Espiritu; nga misinggit Siya didto niadtong adlaw sa paghukom alang Kaniya, kaniadtong giako Niya ang paghukom nga para kanato. Ug gibunal Kaniya ang sungkod sa kapungot sa Dios, ug ang

inyong mga sala gibaligtos didto sa maong sungkod, ug gibunal Kaniya, ug ang Iyang Dugo ug tubig mibugwak gikan Kaniya. Miingon Siya, “Amahan, sa Imong mga kamot itugyan Ko ang Akong Espiritu.” Ug niadtong Adlaw sa Pentecostes, mikunsad Kini aron ubanan kita sa tibuok panaw. Ug Kini’y haduol na kaayo karon.

²⁰⁴ Gusto n’yo bang moingon, “Naglatagaw ako palayo sa panimalay, Ginoo, og pauli na ako”? Samtang ginaawit nato kini, kung buot n’yo nga moduol nganha sa altar ug mohimo og paghalad pag-usab sa kaugalingon n’yo, usab, sa inyong kalag, nagadto kang Cristo? Amen.

I’ve wandered far away from God, (Mitipas sa dalanon.)

Now I’m coming home;

The path of (Dili-pagtoo, nakita n’yo.) too long

I’ve trod,

Lord, I’m coming home.

Coming home, coming home,

Nevermore to roam;

Open wide Thine arms of love,

Now, Lord, I’m coming home.

²⁰⁵ [Ginalaylay ni Igsoong Branham ang *Lord, I’m Coming Home*—Ed.]

²⁰⁶ Tulo ka batang lalaki ang nagaduol na karon, sa gilayon, nagatulo ang mga luha sa ilang mga mata, og nagaluhod karon dinhi sa kilid sa altar. Siyempre, gipasaylo na sila. Gipasaylo na sila bisan sa wala pa sila mitindog sa ilang gilingkoran, sa diha nga nagdesisyon sila. Miduol lang sila sa atubangan ug miluhod dinhi, para mahibaloan sa mga tawo, kung kang kinsa sila nagadapi, niining buntaga.

²⁰⁷ Nahunahuna nako nga basin aduna pu’y mga tigulang nga gustong mohimo niini, nga gustong moluhod, ug moingon, “Ginoo, ako—nahitipas na kaayo ko gikan sa dalanon. Nagduhaduha gayud ako, ug usahay nagalatagaw ako ug nahidangat sa sala. Karon ako—gitunguha ko nga mobalik na sa dili pa ulahi. Dios, ako—gusto ko nga moduol. Gusto ko gayud nga moduol ug moluhod.” Amen.

²⁰⁸ Karon, ang tulo ka batang babaye ni Arthur Beam, nga mga mao ra ang kadak-on, miduol sila dinhi, og miluhod.

²⁰⁹ Ania nagaduol pud ang usa ka batang babaye nga bag-ohay lang nakabaton og bag-ong manghud nga lalaki sa ilang balay. Niadtong miaging adlaw samtang galingkod ako; miabot si Mrs. Wood ug gisultihan ako, miingon nga kining igsoong babaye moadto na kono sa ospital para manganak. Miingon ang Balaang Espiritu, “Lakaw ug sultihi sila nga lalaki kana.” Sa dihang nahimugso na kini, usa gyud diyay ka batang lalaki.

²¹⁰ Daw sa mga kabataan gyud ang ania karong buntaga, ang mga gagmay'ng kabataan gikan sa gamay'ng klase ni Igsoong babayeng Arnold, og ginahalad ang ilang mga kinabuhi. Ang tibuok altar, nganhi sa akong tuo, napuno sa gagmay'ng kabataan.

²¹¹ Nindot siguro kung moawit kita og usa ka himno, sa altar, sa tanang uban pa nga mga kaigsoonan, nga mga hamtong na.

Now, Lord, I am coming home.

Coming home . . . (. . . ? . . .)

Never more to roam;

Open wide Thine arms of love,

Now, Lord, I'm coming home.

²¹² Iduko nato ang atong mga ulo sa makadiyut, para sa pagampo, alang niining mga gamay'ng kabataan.

²¹³ Langitnong Amahan, kung aduna ma'y moabot pa nga ugma, kung maglangay pa si Jesus og napulo o kinse pa ka tuig, kini nga mga batang lalaki ug mga batang babaye ang magadala niining Mensahe sa uban pang mga henerasyon nga moabot. Walay pagduhaduha sa akong hunahuna, Ginoo, nga sa tanang mga adlaw sa ilang kinabuhi mahinumduman gyud nila ang pagduol nila dinhi niining altar. Ug sila'y gagmay'ng mga mutya, Ginoo. Ang ilang batan-on ug mahumok nga mga kasingkasing nakondena karong buntaga. Wala gani nila napatalinghugan ang tibuok Mensahe; bag-o pa lang sila nakapanggawas sa lawak, gikan sa pagpaminaw kang Igsoong babayeng Arnold nga nagatudlo; pero miduol gyud sila dinhi sa altar, ginahalad ang ilang gagmay'ng mga kinabuhi nganha Kanimo.

²¹⁴ Karon, Amahan, bag-o lang kong nahuman sa pagwali nga dinhi kanamo nagapuyo ang Balaang Espiritu. Ug kining Balaang Espiritu, sa pagtoo niining Espiritu, mao'y nagabuhat sa tanang butang. Ug nagatoo ako niining taknaa mismo, nga pasayloon Mo ang matag sala nga ilang nabuhat. Ug nagapangamuyo ako Kanimo, uban sa tibuok pagtoo nga ania sa akong kasingkasing, nga pagatipigan Mo unta ang ilang mga kinabuhi dinha sa pagpanaw. Hinaut nga dili sila mangtipas gikan sa maong Dalan.

²¹⁵ Kini'y usa gayud ka talagsaong butang. Miingon ang Espiritu niining buntaga, nga kami'y "makasaksi og butang nga talagsaon." Dios, kung mihunong Ka na sa pagpakighilambigit sa uban, dawata kining gamay'ng kabataan. Daw sa unsa nga niining buntaga, sa pagtawag sa altar, walay ni usa ka hamtong, kondili ang tibuok grupo hinoon sa gagmay'ng kabataan ang nangduol. Gani, usa kini ka mahimayaong Mensahe nga malisud gayu'ng masabtan, bisan sa mga hamtong, apan nakuha sa mga kabataan ang Espiritu Niini. Ginapasalamatan Ka namo alang kanila, Amahan. Ginatugyan ko sila nganha Kanimo, ingon nga Imong alagad, ingon nga mga tropeyo sa niini

nga panagtigum; para sa, paghinumdum nga ang kanunay'ng-Presensiya sa Tubig sa Kinabuhi magadagayday kanila samtang buhi sila. Hinaut nga magkaaduna sila og pagtoo karon sa kung unsa ang nagakahitabo, nga gipatindog sila sa Dios diha sa ilang gilingkoran ug gipaduol sila dinhi, hinaut nga magkaaduna sila og pagtoo sa Dios sa tanang mga adlaw sa ilang kinabuhi. Hinaut nga ang ilang gagmay'ng mga espiritu madala nganha Kanimo sa adlaw sa ilang kamatayon; og mahibalik sa ilang lawas sa adlaw sa pagkabanhaw. Imoha sila, Amahan. Ginatugyan namo sila nganha Kanimo sa Ngalan ni Jesus.

²¹⁶ Samtang nakaduko ang atong mga ulo. Pangutan-on ko lang ang tanan niining gagmay'ng kabataan dinha sa altar, nga nagatoo nga si Jesus ang inyong Manluluwas ug ang Usa Nga nagsulti kaninyo, dinha sa taliwala sa mga mananambong, nga moduol mo dinhi ug moluhod dinhi sa altar. Nagatoo ba mo nga gihigugma kamo ni Jesus ug ginapasaylo na ang inyong mga sala? Gusto ko nga manindog kamong tanan ug moatubang dinhi sa mga mananambong. Ingon niini, sa ingon niining paagi ninyo masulti sa mga tawo nga nagatoo kamo nga giluwes na kamo ni Jesus. Karon tindog mo, ingon-ana, ug moatubang sa mga mananambong. Kamong tanan nga mga batang lalaki ug mga babaye nga nahigugma kang Jesus, tindog mo ug moatubang sa mga mananambong dinha, ang matag usa kaninyo.

²¹⁷ Kamo usab nga mga batang babaye dinhi sa atubangan? Nagatoo ba kamo? Gihigugma n'yo ba si Jesus? Kining mga batang babaye dinhi, gihigugma n'yo ba si Jesus sa tibuok ninyong kasingkasing? Gihigugma n'yo ba? Gihigugma n'yo ba Siya? Gihigugma mo ba Siya, pinangga? Tindog mo dinhi, ipahibalo n'yo sa mga tawo nga gihigugma ninyo si Jesus. Panalanginan kamo sa Dios.

²¹⁸ Karon mobiyu kita *dinhi* dapit ug mag-awit para niining mga kaigsoonan sa dili pa kita mobiya, "Gihigugma ako ni Jesus! Nasayod ako niini, ginaingon man kanako sa Biblia." Kita n'yo? Ipataas nato ang atong mga kamot samtang ginaawit nato kini. Sige, awiton nato.

Jesus loves me! This I know,
For the Bible tells me so;
Little ones to Him belong,
They are weak . . .

²¹⁹ Karon ipataas ang inyong mga kamot...?...Magdungan kitang tanan:

Yes, Jesus loves me,
Yes, Jesus loves me,
Yes, Jesus loves me,
The Bible tells me so.

²²⁰ Karon kamong tanan sabat mo sa ako: Nagatoo ako nga si Jesus Cristo mao ang Anak sa Dios. Karong adlaw, ginadawat

ko Siya ingon nga akong personal nga Manluluwas. Sugod niining adlaw, gikan karon, higugmaon ko Siya ug alagaran Siya. Amen.

221 [Nagaingon si Igsoong Ben Bryant, “Igsoong Branham, ania sa akong kasingkasing niining orasa ang akong upat ka anak. Mahimo ba nga iampo mo sila palihog?”—Ed.] Sige, Igsoong Ben.

222 Langitnong Amahan, nakita niining tawo nga ang ubang gamay’ng kabataan nagaduol kang Cristo, ug nagatuaw siya, ingon nga usa ka amahan, alang sa iyang gagmay’ng mga anak. Ug ang Espiritu nga nagdala niining gagmay’ng kabataan nganhi sa altar, hinaut nga luwason niining mao ra nga Espiritu ang iyang mga anak, Ginoo. Itugot kini. Ginatugyan namo sila nganha Kanim, Amahan, sa Ngalan ni Jesus Cristo.

223 Karon samtang nagabalik kamong gagmay’ng kabataan diha sa inyong lingkoranan, gusto ko nga ang tanan diha niana nga laray makiglaman niining mga gagmay’ng kabataan, o pikpikon sila samtang nagabalik sila dinha. Balik na mong tanan sa inyong mga lingkoranan, sa *niini* nga agianan. Ug ang tanan nga anaa dinha pikpika n’yo ang mga gagmay’ng kabataan. Ug gihigugma namo kamo sa tibuok namong kasingkasing. Mga miyembro na kamo sa Lawas ni Cristo, kabahin gyud kamo Niini maingon sa tanang uban pa kanamo.

We’re marching to Zion,
Beautiful, beautiful Zion;
We’re marching upward to Zion,
That beautiful City of God.

Come, we that love the Lord,
And let our joys be known,
Join in the song with sweet accord,
Join in the song with sweet accord,
And thus surround the Throne,
And thus surround . . .

Maanindot gayud nga pag-awit! Ipataas nato ang atong mga kamot karon.

We’re marching to Zion,
Beautiful, beautiful Zion;
We’re marching upward to Zion,
That beautiful City of God.

Maglamanohay lang kita sa usa’g usa samtang nagaawit kita karon.

We’re marching to Zion,
Beautiful, beautiful Zion;
We’re marching upward to Zion,
That beautiful City of God.

224 Karon manindog kita samtang nakaduko ang atong mga ulo, samtang atong. . .Tugtoga kini palihog Igsoong Teddy, usa lang. . .

225 Adunay mga paghangyo nga naitunol sa ako dinhi, ug mga panyo ug uban pa. Tingali'g gikan pa ang mga niini sa gawas sa nasud. Ngani nagsulti sa ako si Billy nga aduna sila'y usa ka pares sa medyas gikan sa usa ka masuso sa England, mga *ingon niini* ang katas-on, bakul kono ang maong bata. Ug busa magampo kita para kaniya, usab.

226 Ug busa. . .[Nagaingon si Igsoong Ben Bryant, "Igsoong Branham, pasensya na kung mosagbat na pud ko, pero iampo usab, kung si kinsa man ang nagbangga sa among sakyanan kagabii, sa may tuo nga bahin sa babag sa akong sakyanan, iampo palihog nga mapadayag unta. Iampo nga ipadayag unta sa Ginoo."—Ed.] Amen, Igsoong Ben, buhaton ko kana. [Ginalaylay ni Igsoong Branham ang *We're Marching To Zion.*]

227 Sa among pagmartsa, Ginoo, nasayod kami nga ang gibunalan nga Bato ania ra mismo uban kanamo, ang kanunay'ng-Presensiya sa Tubig gikan sa Bato nagauban mismo sa Iglesia. Oh Eternal nga Dios, ipadagayday nganhi kanamo, niining buntaga, ang pagtoo sa niining Dios nga ania uban kanamo. Nasayod ako nga buhaton Mo gayud, ingon nga makakaplag kami og kahimuot Kanimu, og ingon nga mahimo Mo Kining isalig kanamo. Kung ihatag Mo kini nganhi kanamo sa kadagaya, basin masayup kami sa paggamit Niini, Ginoo. Pero kung makakaplag man kami og grasya diha Kanimu, nan itugot nga mahitabo kini.

228 Miingon ang among igsoon nga adunay nagbangga sa iyang sakyanan. Oh Dios, nasayod kami nga walay kuwarta ang among igsoon para ipaayo kining mga naguba. Ginaampo ko nga Imo untang kondenahon ang maong tawo, o unsa man, aron maghinulsol siya tungod sa pagbuhat niini, og moduol, nga moingon, "Igsoon, ipaayo nako ang imong sakyanan, ako man ang nakabangga." Tabangi intawon si Igsoong Ben ug iyang mga minahal sa kinabuhi.

229 Ania sa akong kamot ang mga panyo ug mga paghangyo, nga may pagtoo sa Dios. Si Moises adunay pagtoo sa Dios, ug nalabang niya ang dagat. Si Daniel adunay pagtoo sa Dios, ug napahigawas siya gikan sa langub sa mga leon. Sila ni Sadrach, Mesach, ug Abednego aduna gayu'y pagtoo Kaniya, ug mao nga napalong ang kalayo.

230 Si Pablo aduna pu'y pagtoo Kaniya, ug usa ka adlaw kaniadtong malisud na kaayo ang mga pagtigum ug dili makaduol si Pablo sa kang kinsa man, mikuha lang siya og usa ka panyo, og miingon siya, "Nagatoo ako nga ang Dios ania uban kanako." Gipatong niya ang iyang mga kamot sa mga panyo ug mga panapton, ug ang mga espiritung dautan migula sa mga

tawo, ug mibiya kanila ang mga sakit ug mga balatian. Dios, aduna usab ako'y pagtoo sa mao ra mismo nga Dios. Hinaut nga mokalagiw ang dautan. Ang mga sakit, mga balatian, ug mga pag-antus, hinaut nga mokalagiw kini, Ginoo.

²³¹ Ikaw ang mao gihapon nga Dios nga nagpakigsulti kanako diha sa Haligi nga Kalayo, didto sa suba. Ikaw Mao kadtong naretratohan ang Imong hulagway uban kanako og ania kini nakasab-it, sa dingding. Ania Ikaw uban kanamo, Ginoo. Ikaw anaa gyud sa kanunay, ang mao gihapon nga Haliging Kalayo. Ug nangalipay kami sa Tubig gikan sa Bato sa matag adlaw, samtang nahiusa kami diha sa Espiritu. Bueno, ania Ikaw. Aduna kami'y pagsalig Kanimo, Ginoo. Aduna kami'y pagtoo Kanimo. Nagatoo kami nga Imo kaming dihogan ug tabangan kami. Dili para sa among kahimayaan, Ginoo; mamahimo kaming sama ni Moises kung ingon-ana, kaniadtong nakabuhat siya og sayup. Buot namo nga adunay buhaton aron motabang Kanimo, Ginoo. Mao kana ang katuyoan sa among kasingkasing, ang makatabang Kanimo, kung mahimo namo. Ipakita kanamo, Amahan, kung unsa man ang buot Mo nga ipabuhat kanamo.

²³² Ug karon, sa pagpamuhat sa pagtoo, ginakondena ko ang sakit nga ginarepresentar niini nga mga panyo, ug niini nga mga hangyo. Manghawa unta ang mga niini sa mga tawo. Nasayod ako nga Imong buhaton kini, Ginoo. Nagatoo ako niini, sa akong kasingkasing, nga buhaton Mo kini. Ayoha ang tanang sakit nga ania sa among taliwala niining buntaga.

²³³ Luwasa ang mga nanagpataas sa ilang mga kamot, nga miingon nga ginatinguha nila nga moduol na sa Bato, alang sa Tubig. Dios, hinaut nga uhawon kaayo sila karong adlaw, hinaut nga magkaaduna gayud og asin sa ilang kinabuhi, nga maghinungdan sa pagkauhaw nila kang Cristo. Itugot kini.

²³⁴ Ubani kami unyang gabii, Amahan. Oh Dios, itugot nga mahibaloan ko, pinaagi niini nga mga hangyo, kung unsa ang anaa sa kasingkasing sa mga tawo. Kung walay unsa man sa ilang kasingkasing, kung ingon-ana, Ginoo, nan hatagan Mo ako og hilisgotanan nga igawali nganha sa ilang mga kasingkasing unyang gabii.

²³⁵ Panalangini ang among Igsoong Neville, ug ang iyang asawa, ang iyang pamilya; ang among gamay'ng iglesia, ang among mga tinugyanan, ang among mga diyakono, og ang among mga miyembro. Ug ang Imong Lawas sa tanang dapit, magauban Ka kanamo, Amahan. Amo kining ginatugyan nganha sa Imong mga kamot, sa Ngalan ni Jesus Cristo.

... Zion;

We're marching upward to Zion,

The beautiful City of God.

Karon atong awiton kini, nga tinuod, ingon gyud ka tinuod alang Kaniya karon. Kita n'yo?

Come, we that love the Lord,
And let our joys be known,
Join in the song of sweet accord,
Join in the song of sweet accord,
And thus surround the Throne,
And thus surround the Throne.

Samtang nakaduko ang atong mga ulo karon.

We're marching to Zion,
Beautiful, beautiful Zion;
We're marching upward to Zion,
The beautiful City of God.



ANG TUBIG NGA KANUNAY'NG-ANAA GIKAN SA BATO CEB61-0723M
(The Ever-Present Water From The Rock)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Hulyo 23, 1961, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org